





函  
湖  
棗

1110  
1

110  
1-2

1100  
1

光緒四年孟春  
泐江書局重刻

西湖志序

地雖勝而非有利於民有益於國家止足以供山人游客搜奇攬勝之資任封疆者不過而問焉至利於民而有益於國家矣而其地勿勝無往跡前事可考據則其名亦勿著杭之西湖近在郭門外出湧金錢塘清波三門昂首注目四山周遮水天一碧無登涉搜攬之煩而全湖之勝盪胸填膺高下在目六合之內不乏名勝求其與闐闐相接郭內外之民朝斯夕斯一舉足卽食湖之利舉天下

名山川莫或與之媿也湖爲百泉所潄雖旱歲不竭杭屬仁和錢塘海鹽三邑田畝皆資灌溉其下流並海而東

國家鹺政歲兩掣舳艫銜尾會省門掣竟始散往各配食州縣其取道率由於此是則湖之有利於民有益於國家固大彰明較著者矣我

皇上御極之三年奉

命開濬西湖越歲而臣衛受任撫浙兼理鹺政過所爲西湖者淤泥菰葑充塞瀾漫問所爲六橋兩隄及

其他古蹟則傾圮相望甚至莫能指目其處篙櫓無所用而舟人失業網罟無所施而漁子就閒傍湖之民無復有食湖之利者遑問田畝之資灌溉鹺艘之稱利涉哉於是集議開濬會鹺司今光祿卿臣王鈞肩其任捐已貲以給工費期年而淤者通塞者去傾圮者整理之山重點翠湖再潑油彩鷁紅檣箭穿梳織加以蒔果栽花種魚養竹西湖名勝頓復舊觀夫而後田畝足資商艘有賴郭內外之民一舉足而仰事俯育不啻朝有掇而暮有

拾也

國家當全盛之時雲漢昭回生植暢遂山川草木各有鬱蔥向榮氣象此不特西湖為然而獨西湖艷人齒頰者由其地勝足以仰承天澤造物者亦特有以鍾之至於春之日秋之夕游人士庶歌咏太平悠游化日景物之間別具太和翔洽之致則自唐宋元明以來湖之盛未有過於今日者矣恭惟

聖祖仁皇帝五次省方周諮民隱蠲租肆赦

湛恩汪濊守土諸臣建

行宮於湖上閭閻無絲粟費而瞻雲就日之思愈久而不能忘

皇上俯順輿情改為

聖因寺虔奉

御牌以慰民望他若湖山廟丁家山金碧照耀南北映帶又皆唐宋元明以來所未闢之境而創自今日者會城文武僚屬遇歲朝長至或初履任及他省仕宦道經武林必相率詣

聖因寺瞻叩

聖祖神御龍牌通省士民熟聞習見於以發其尊君親上之心是又教化之所由與其爲利益於民於

國家者又豈獨田畝之灌溉商艘之利涉已哉湖舊有志以遊覽名此特山人游客搜奇攬勝之所取於國計民生夫豈有當因修通志之餘纂緝斯編計溯源流分別門類而附以典故詞章俾後之任斯土者知湖之有利於民有益於

國家以無負

聖天子命加疏濬之盛心至歲修之資則有臣衛經理

時光祿所捐置田畝在收其人以時葺治之事易集而公私固無擾也梓成謹識其緣起如此

雍正十二年暢月之吉

欽命太子少保兵部尚書總督直隸等處地方管轄紫荆密雲等關隘贊理軍務管理糧餉兼都察院右副都御史前浙江總督管巡撫事兼理鹺政節制江南臣李衛謹序

西湖志序

浙東西包絡山川而省會之地西湖擅其勝湖近  
 據城闔崇岡疊巘自天目東來蜿蜿蟺蟺融結凝  
 聚淳瀟秀液故歷唐宋以還人物之盛麗井邑之  
 雄富甲乎東南而賢達勝士磊落代興傑構貞珉  
 後先輝映宇內談名勝者多艷稱之則夫傳勝事  
 於武林探奇踪於靈竺斯亦徵文考獻者所必及  
 也明嘉靖中田副使汝成嘗作西湖遊覽志撰勝  
 撫言頗資揚扆然詮綜前聞猶或簡略不免議者

遂有星一漏十之譏顧自田志後百餘年來無繼  
作者恭逢

皇上御極之七年

詔天下各修省志於時海宇清晏闔澤沾濡杭民既富  
完安樂而西湖適當奉

命開濬之後百廢具舉前督臣李衛爰卽編輯浙省通  
志之餘兼及湖志慎選名俊博徵載籍搜考參稽

閱一載而卒業歲甲寅臣奉

簡命總制閩浙忝荷重寄底厲不遑未暇一攬湖山之

勝今年春由海道巡歷至浙爰周覽浙東西山川  
形勢舉凡土田之高下原隰之縱橫與夫陂塘堰  
埭瀦防蓄洩之宜莫不賅於目而識於心然後知  
西湖蘊靈毓粹蠲潔停深形勝關乎郡城灌溉資  
夫旁邑非僅爲游覽之地已也竊嘗率賓佐僚吏  
沿溯湖中恭謁

聖祖仁皇帝神御龍牌伏覩當年

翠華南幸

睿藻留題爲萬古不泯之勝蹟我



皇上宸翰屢頒

天章炳煥照耀湖山迴巒若增而益高澄波若浚而益深四時風景月異歲新太和翔洽之象溢於目睫洵宇宙之大觀而昇平之勝槩也會新志剗剗既竣治事之餘輒一流覽見其文質相宣繁簡合度分門別類比事屬詞體例一準於通志爲門二十爲卷四十有八首紀水利昭

聖朝經制之周詳遞述名勝見熙時景物之韶令記山川則標敘脈絡傳人物則昭紀鴻懿物產徵品彙之繁古蹟景前賢之範祠宇寺觀考時地而察廢興隄塘橋梁審修建而知治理旁及碑版之作金石之文莫不遐蒐逖討州次部居傳述悉本舊聞徵引各標書日以言乎詳則不支以言乎贍則不穢以言乎采獲則備矣臣不文雖未及握槩懷鉛躬與讎比而獲觀是書之成颺言簡端以導揚美盛歌咏太平抑何幸歟爰標舉梗概而爲之序  
雍正十三年端月之吉

兵部尙書總督福建浙江等處地方軍務兼理糧

西  
湖  
志  
三  
餉兼都察院右副都御史拜他喇布勒哈番加八  
級紀錄三十八次功加一等臣郝玉麟謹撰

西湖志序

浙爲國負海而抱江水利所在徧郡縣然其陂澤  
瀦浸大者有三在浙西者爲杭州之西湖在浙東  
者爲越州之鑑湖明州之東湖考西湖本名錢唐  
湖與鑑湖並著於漢代名勝甲於東南而唐宋以  
來天下又競稱西湖自名公卿賢士大夫下逮芸  
夫牧豎無論至與不至皆流連愛慕津津齒頰豈  
徒以水光山色足供游覽之娛而已哉凡以蓄洩  
灌溉利益於國計民生者有甚大也恭遇

聖祖仁皇帝省方南巡嘗五次駐蹕以故其地益重而山川之靈淑景物之繁華尤爲自古以來未有之盛歲丁未臣奉

簡命出守會稽得縱觀鑑湖千巖萬壑之勝及考舊牒知東漢太守馬臻實開湮淤通渠開使民得世享其利則未嘗不嘆古良吏若史起姜師度邴夏諸人率所至輒興修水澤之利皆所以爲稼穡計也繼而攝篆四明又見東湖之有關農事與鑑湖同故先後皆嘗親詣原隰相度泉流以時疏濬由是

瀕兩湖而田者歲咸有秋然豈若西湖之水利尤有裨於國計民生也哉越甲寅仰荷

聖恩擢任兩浙漕使遂來杭州間以公事往來湖上察其停匯之源宣洩之所不特負郭兩邑及鹽官數萬頃之田資其滋溉卽省城內外上下兩塘諸運河皆藉以灌輸而漕司掣運所係尤重然則西湖之利可謂溥矣我

皇帝御極之二年

特飭督撫會勘定議動帑疏濬以故源益深而流益廣

蓄洩以時旱潦有備洵足垂利萬世至於山翠如  
螺波澄若鏡樓臺亭榭繡錯綺分而環湖松篁菴  
蔚雲嵐週遮樵唱漁歌與波而上下無一不足以  
徵

聖朝深仁厚澤太和翔洽之象匪僅供詞人騷客選勝  
探奇已也前督臣李衛博採舊聞搜羅掌故重修  
西湖志條次詳整編敘醇雅一披覽而湖中景物  
與古今著述無美不收有非田氏舊志所可比絜  
者西湖固天下名區而唐宋以來又多賢牧守如

李泌白居易蘇軾則其最著皆嘗開濬以垂功德  
於民而況

聖天子宵旰勤民經營疏治其規模度越前代有出於  
萬萬者則敬謹記載誠不容以或略也臣愧不文  
不獲與鉛槧之末願猶得於志之成也恭誌一言  
以附名簡末抑何幸歟謹懼忤踴躍而爲之序  
雍正乙卯二月花朝前一日

總理兩浙江南等處都轉運鹽使司兼管浙江清  
軍驛傳水利事務鹽驛道副使臣顧濟美謹撰

西湖志序

寰海之內以西湖名者三十有一處而錢塘之金牛湖特著謂是溪澗之滄泓林麓之窈窕佛圖仙觀之眇青胸碧足以侈遊觀節登眺而已乎蓋其地當四山之下注演迤清澄長輸而遠達設板置牖以時其鍾洩下邑之田藉以灌浸凡數千百頃故言浙西水利者此焉爲大洪惟

聖祖仁皇帝省方南幸湖干屢邀

駐蹕名勝所在

錫以歌咏

天章璀璨照耀寰區兩峰若加而高三潭若濬而深草木  
向榮皆有欣欣之色臣民謳思無已恭建

行宮於上我

皇上卽位之六年

特允督臣李衛之請改爲佛寺

御書聖因寺額虔奉

聖祖神御龍牌使臣民得以敬謹瞻禮以慰其愛戴之思  
是則兩浙之被

恩較他省爲尤渥也前此我

皇上特頒

諭旨軫念浙民之疾苦開濬西湖以興水利於是前督  
臣衛鹽道臣王鈞相仗協助鬻泥芟葑清民田之  
佃佔者湖面砥平頓還舊觀於是下田屢獲豐稔  
方春之初天竺香市以香帛來祈報者熙熙攘攘  
輻輳於兩隄之間翱翔化日之舒長歌咏太平之  
景象督臣衛又於宋時十景之外增飾一十有八  
處以成名勝之大觀而守土之吏亦得以時沿濶

瀨湖淵潭益穆然想我

聖天子湛恩之汪濊焉撫松杉蔭花柳益穆然想我  
聖天子厚德之栽培焉觸目而警於心根心而施之政  
可以勵官常可以敦臣節可以當牧民之寶鑑矧  
夫功德之坊勳賢之祠清風亮節之廟貌櫛比鱗  
次觀感而觸發於以興民行而育民德實在於是  
然則西湖志之作烏容已哉前督臣衛創有成書  
發凡緣起其例已具臣不敏前司鹽筴近任旬宣  
獲與校讐之役因刊成而識其大概若此使守此

土者得以鑒焉

浙江等處承宣布政使司布政使前鹽驛水利道

副使

臣

張若震謹撰

西湖志序

粵自河渠有書溝洫有志歷代史氏於水利多詳  
 言之而山川之形勝景物之繁昌亦備著焉凡以  
 水利之繫於國計民生者甚鉅而求端竟委所以  
 資考鏡備掌故者誠不容以或略也欽惟我

皇上法天因地宵旰勤民

御極之始卽大興水利肇自西北爰及東南

特念浙江西湖有關農田漕運

敕督撫會勘發給重帑大加濬治維時方勠興



西  
湖  
志  
三  
序  
畿輔營田 臣 紘蒙

恩擢任清河道凡溝澮川涂之事瀦防均寫之宜一皆稟承

睿訓悉力奉行於是隰臯沃衍繡錯綺分然後知水之爲利如是其溥且博而

王政所先爲典有甚鉅也嗣蒙量移浙藩職司旬宣因得周覽浙西上下見水之自外至者宜防其患莫如錢江水之自內出者實資其利莫如西湖蓋江與湖相爲表裏而江水不至之處皆湖水之所灌

輸苟湮淤阻塞爲患有甚於江湖衝激者矣自疏濬以來緣江數邑之田歲屢有秋而鹽漕轉輸商賈輻輳公私利賴其明效大驗彰彰若是不有記載奚以恭紀

聖恩而昭示永久會奉纂通志校閱之餘適前督臣以新修西湖志一編屬爲訂定因受而卒業見其首紀水利一門詳志

聖朝軫念民瘼興利萬世之至意而於歷代興廢之由亦三致意焉其他若隄塘堰廂橋梁筧壩之屬亦

莫不條分縷晰按部就班大約取明田汝成舊志而損益之訂其闕失汰其繁冗若領之在綱鉅細不遺與史臣書河渠志溝洫之意若出一轍可謂知所本務矣伏念西湖自

聖祖仁皇帝省方駐蹕以來德洋恩普民物雍熙已極千古未有之盛事茲復蒙疏濬山川效靈獻奇呈秀風景日新開億萬年太平之象臣於治事之暇閒一至其地覽山川之形勝觀景物之繁昌未嘗不流連洄溯歎爲宇內之大觀而益信是編之記載

爲不容略也剗剗未竣卽奉有巡撫皖江之

命遙望西湖渺不可卽猶得於是編一展卷閒而水光山色如在几席抑何幸歟以忝與校讐之末例得颺言簡端且臣曾任水利專官而於藩宣浙水諸大政亦深見其未有重於此事者故特舉西湖水利之大端謹拜手稽首而識諸末簡

賜同進士出身

誥授通奉大夫巡撫安徽等處地方提督軍務都察院右副都御史前浙江布政使司布政使臣王紘謹

撰

西湖志序

西湖志前督臣李衛因修浙通志而及之首水利  
 次名勝因水利而及隄塘堰牐橋梁因名勝而及  
 山水寺觀園亭祠宇古蹟藝文旁及志餘外紀凡  
 四十八卷臣元章至浙三年鏤板始成謹序之曰  
 浙會城以江海為門戶而西湖其堂奧也是故西  
 湖之水重與江海埒考厥所繇雖地則然顧不以  
 時哉明聖靈鷲始見於漢晉間不甚顯至唐宋始  
 大著然興廢亦屢矣我

聖祖仁皇帝五幸其土

天章御製以褒揚寵命之我

皇上特論興修以紹大功而後溥博闋麗超歷朝而垂萬世地猶是也惟遇重熙累洽太平極盛之時以至於此人見湖水之蓄洩通漕鹽以利

國溉田供汲以利民濟舟楫以利商旅而知

九重之軫念深而睿慮周也人見草木禽魚之蕃庶與馬權槩之絡繹而知

聖澤之滄浹於民久樂樂而利利也人見法王之宮名賢

之宇高士之廬輪奐烏翬瞻仰恐後而知

盛世之民嚮化慕善風淳俗厚感天和而饒物力也於焉志之

帝德於以昭天心地力於以彰人風於以傳故今之志宜什伯於前志之美者非美於其紀載而美於其所紀載者也夫西湖天下所在有之而杭獨著者豐於水者畜於山此則環山爲岸行於水者沮於陸此則隄互梁接水放於荒遠寥闊而此則麗於城郭錯於園廛水虞其波濤湍悍而此則淨如練

平如鑑其源不涸其流不辱其土宜種植其風氣  
藏聚其水清甘曩哲所云天造地設者也是以度  
越諸川而擅名於世蓋九百七十餘年匪今斯今  
矣而臣謂繫於時者白蘇趙楊諸臣狀奏題請幾  
至廢格以幸有成績豈若洞自

宸衷渙汗出綸之易吳越南宋割據偏安以詔繁華揚  
盛美豈若

一統版章

巡狩省方之大遊宦過賓之歌吟毫札豈若

天語之崇山人仙釋所棲託豈若

神御之尊名人之題額碑版豈若

宸翰之貴九百餘年以來兼之者有之乎無之也故曰  
惟今之時爲然且夫志水者詮其利志地者標其  
勝自昔已然然而葑田芟蕩水簾桑埂未嘗不數  
闕其利而揜其勝今自

翠華臨幸以來四十年於茲湖之內水益浚而深隄益培  
而廣寺益拓而新祠廟益增而麗卉木益蒔而滋  
湖之外渠益通而流田益漑而腴

聖天子睠懷於上士庶農女歡悅誠敬於下封疆大吏帥其僚屬以仰體俛懃因利踵事歲繼月繩相積於永永則是湖之沛恩波流惠澤者億萬年無疆而是志也傳世行遠亦立言於不朽可徵也臣樂觀厥成颺言於策與有榮幸矣

雍正甲寅重九日

賜進士及第總督浙江等處地方軍務兼理糧餉管理巡撫事務并兩浙鹽政兵部右侍郎兼都察院右副都御史臣程元章謹序

西湖志

纂修職名

總裁

李少儀都察院右副都御史總督浙江等處地方軍務兼理糧餉管理巡撫鹽政兼管南七府五州督捕務臣李衛

總督浙江等處地方軍務兼理糧餉管理巡撫鹽政事務兵部右侍郎兼都察院右副都御史臣程元章

參訂

巡撫江南安徽等處地方提督軍務都察院右副都御史前浙江等處承宣布政使司布政使臣王紘

浙江等處承宣布政使司布政使臣張若震

提調

光祿寺卿前兩浙都轉運鹽使司兼管浙江清軍驛傳水利事務鹽驛道副使臣王鈞

浙江等處承宣布政使司督理糧儲漕務道副使臣朱倫瀚

兩浙都轉運鹽使司兼管浙江清軍驛傳水利事務鹽驛道副使臣顧濟美

協理

卓異候陞副使道浙江杭州府知府臣秦炳

江南松江府知府前兩浙寧紹温台分司運副臣汪德馨

兩浙寧紹温台分司運副臣謝棠

兩浙嘉興松江分司運判臣孔毓鉉

總修

原任翰林院編修武英殿纂修官臣傅王露

分修

浙江杭州府學教授癸巳科進士臣蘇滋恢

薦舉博學鴻詞浙江庚子科舉人揀選知縣臣厲鶚

薦舉博學鴻詞浙江甲辰科舉人揀選知縣臣杭世駿

浙江己酉科舉人揀選知縣臣陸秩

薦舉博學鴻詞江南蘇州府學廩生臣沈德潛

議敘正八品杭州府學歲貢生臣吳焯

薦舉博學鴻詞浙江杭州府仁和縣監生臣趙信

浙江杭州府海鹽縣學生員臣吳嗣慶

浙江嘉興府平湖縣監生臣張雲錦

浙江湖州府德清縣學廩生臣陳璠

分校

浙江癸卯科副榜貢生臣周錚

浙江杭州府仁和縣學生員臣沈甲

薦舉博學鴻詞浙江杭州府錢塘縣學生員臣汪沆

浙江杭州府仁和縣監生臣趙一清

風督刻

兩浙鹽運使司經歷臣鄭維翰

卓異留浙以知縣用兩浙鹽運使將盈庫大使臣楊玉生

浙江杭州府仁和縣貢生臣吳廓

浙江杭州府錢塘縣監生候選州同知臣汪士雅

浙江杭州府錢塘縣監生候選州同知臣吳城

浙江杭州府錢塘縣監生候選州同知臣汪志偉

浙江杭州府錢塘縣監生考授州同知候選光祿寺署正臣題留海塘紀錄臣楊曾琦

浙江杭州府錢塘縣監生候選州同知臣王惟果



浙江杭州府錢塘縣學貢生臣汪璿

浙江杭州府仁和縣監生候選州同知臣薛景瑄

浙江杭州府學歲貢生候選州同知臣汪忠高

浙江杭州府錢塘縣學貢生候選縣丞臣江正衡

浙江杭州府學貢生臣鮑兆麟

浙江杭州府錢塘縣監生候選州同知臣吳永昌

浙江杭州府錢塘縣監生候選州同知臣汪元璉

浙江杭州府錢塘縣監生臣汪士倬

江南徽州府歙縣監生臣江定瀚

浙江杭州府仁和縣監生候選州同知臣葉世紀

江南蘇州府常熟縣監生候選州同知臣孫岐福

浙江杭州府仁和縣學歲貢生候選州同知臣吳國鎡

浙江杭州府錢塘縣監生候選州同知臣吳國藩

西湖志公門高第民氣一辭凡將邑志汎未詳答  
凡例

西湖志

凡例

一字內名山大川莫不有志要以補郡縣志所未備也西湖名勝甲於東南而宋元以前未有專志明嘉靖閒提學副使田汝成始創爲之名遊覽志考漢時金牛見湖瑞應明聖而湖流蓄洩實資灌溉田疇濟民食而通運道故言兩浙水利者輒及西湖豈直爲遊覽之地已耶顧歷代以來舉廢不一國朝鼎興重熙累洽恭逢

聖祖仁皇帝軫念蒼黎屢舉省方之典

巡幸至浙駐蹕湖山明聖之瑞昭然千古雍正二年我

皇上特因西湖水利切繫民生

命督撫會勘大加疏濬由是浙西年穀順成人文蔚起

舟航輻奏居民利賴無窮而湖山景色亦復燦然

改觀成億萬年太平之象非敬謹紀述奚以昭示

來茲而垂永久會奉

敕纂修通志鉛槧之餘爰取田志重加釐訂悉準通志

之例分門記載另爲一編凡郡邑志所未備者俱

詳見於此

一田汝成舊志止爲遊覽而作故總敘之外不分門

聖賢類但依遊歷所經蟬聯詮次凡山水隄塘橋梁寺

觀之屬夾雜登載雖別出新裁而未合志體今分

列各門而於各門之中仍分五路曰孤山路曰南

山路曰北山路曰吳山路曰西溪路依路順敘庶

便覽觀

一西湖代有疏濬而水利之議莫詳於宋蘇軾明楊

孟瑛二疏然宋僅用常平減價餘米及度牒之費

明傭夫一百五十二日爲值僅二萬有奇資用少則功力薄歷歲漸遠復致湮淤我

皇上念切民依特重水利凡有興作皆不惜重帑以成經久之圖故開濬以來湖面深廣支流暢達復留羨資置額田以供歲修誠萬世無疆之利也謹詳載水利備列開濬事宜以志

聖澤之汪濊云

一西湖名勝自宋時卽有十景之目而湮廢日久舊志亦已失載康熙三十八年

聖祖仁皇帝臨幸西湖

親灑宸翰分題十景龍翔鳳翥輝映湖山而西湖名勝始

昭垂於天壤之間由是山川煥采日異歲新隨處皆成麗境撮奇標勝形諸繪事共爲四十圖各系一說並綴古今題咏以供全覽

一西湖負郭環山脈絡聯貫瀕江帶河支流四達故凡城內城外上河下河以及大江西溪均屬西湖山水悉依舊志登載

一湖水惟恃隄塘瀦洩而後旱潦有備如白居易之

西泠志 凡例 三  
登石覓蘇軾之築長隄皆爲瀦洩計也有隄塘則有橋梁有堰閘均以次類及

一通志園亭俱列入古蹟惟西湖園亭多係

國朝新建崇奉

天章卽前人遺構亦現今增葺規制重新皆足潤色湖山開拓風景故專志園亭一門若古有今無名存實廢者仍載入古蹟

一西湖琳宮梵刹遠近相望惟雲林天竺淨慈諸處屢奉

聖祖仁皇帝翠華臨幸恩普招提自宜敬謹記載至

行宮駐蹕之地浙民愛戴無窮慕思彌切籲請改建

一佛寺朝夕焚香祝頌

御書聖因寺額虔供

聖祖神御龍牌俾萬世臣民永永瞻仰列於寺觀之首

一崇德報功莫重於祀典西湖地居省會凡有功德在民者輒建祠其上蓋其地靈斯爲神所憑依宋人有配食水仙王之句義取此也故凡有合於祀典者悉爲登載非是勿錄

一古人遺蹟至今尙存者俱分見各門惟時地已易而踪跡全湮或基址雖存而稱名已別者所當搜討以寄懷古之思

一名區勝境必待人而後顯果其人功業文章足爲湖山增重則不必盡屬浙人自當與西湖並垂不朽至遷客騷人縉流羽士亦例得並載

一陂塘蒲葦之入昔人每詳言之蓋天地自然之利不可不知所以樽節愛養之也西湖一隅水鄉雖無奇珍異錯而通都大邑之所產靡不畢具由是

居湖小民得以經營負販而自贍衣食夫孰非因民而利之之道耶故志及之凡昔人形諸歌咏者亦採摭焉

一名流詞翰旣壽金石而龜趺蟲篆苔封塵翳者不少搜討及之以見前人深意之所在云

一學士操觚多託名山以傳不朽故有專爲西湖撰述者雖卷帙單行亦足備湖山掌故特存其篇目注明卷數并詳撰人姓氏爵里以備考索其不專屬西湖者軼之

一法書名畫總爲西湖設色寫真第零縑斷素如過眼煙雲每多散佚止就觀記所及者錄存其槩

一藝文有專屬者自宜分隸各門以合比事屬詞之義其概論湖山之勝而無所附麗者則統爲藝文志分別各體以時代爲詮次若鴻篇鉅製各門不及盡收亦得併入第名作如林蒐羅未廣於膾炙人口中擇其尤雅者登之

一自匡韓說詩而後世有詩話之作宋許顛云詩話者所以備古今記盛德錄異事証訛誤也西湖記者載大抵不出篇什而事往風微指歸莫定則詩話尙焉故撰次於藝文之後

一田汝成舊志於遊覽志之外別有志餘二十六卷每卷各標一目遐搜博討可謂勤矣雖其自敘云多述游冶之談非長化者所取然徵文徵獻存什一於千百亦載筆者之職也取其足資考鏡垂勸戒者亟登一二而仍其名曰志餘所謂裁翦之遺兼收並蓄者也或事不涉西湖而爲舊志所錄者別入外紀以資閱覽

西湖志總目

卷一 樂

卷二 水利

卷三 名勝

卷四 名勝

卷五 名勝

卷六 名勝

卷七 名勝

卷八 名勝

卷一 樂  
 卷二 水利  
 卷三 名勝  
 卷四 名勝  
 卷五 名勝  
 卷六 名勝  
 卷七 名勝  
 卷八 名勝



卷五

山水 一

卷六

山水 二

卷七

隄塘

附堰閘

卷八

橋梁

卷九

園亭

附書院

卷十

寺觀 一

卷十一

寺觀 二

卷十二

寺觀 三

卷十三

寺觀 四

卷十四

祠宇 一

卷十五

祠宇 二

卷十六

古蹟 一

卷十七

古蹟 二

卷十八

卷古蹟 三

卷十九

卷名賢 六

卷二十

卷名賢 五

卷二十一

卷名賢 三

卷二十二

方外 二

卷二十三

方外二

卷二十四

物產

卷二十五

冢墓一

卷二十六

冢墓二

附塔院

卷二十七

卷二十八

碑碣二

附鐘鼎

卷二十九

撰述四

卷三十

書畫

卷三十一

藝文一

賦記

卷三十二

藝文 二 序 引 題跋 辨 雜著

卷三十三

藝文 三 詩 五言古

卷三十四

藝文 四 詩 七言古

卷三十五

藝文 五 詩 五言律 五言排律

卷三十六

卷藝文 六

卷三十七

藝文 七 詩 七言律 七言排律 五言絕 六言絕

卷三十八

藝文 八 詩 七言絕

卷三十九

藝文 九 詩 七言絕

卷四十

藝文 十 詞

卷四十一

藝文 十一 竹枝詞

卷四十二

藝文 十二 閨秀詩

卷四十三

詩話 六

卷四十四

詩話 七

卷四十五

志餘 一

卷四十六

志餘 二

卷四十七

外紀 一

卷四十八

外紀 二

後序

卷四十六

西湖志卷之一

水利

西湖源出武林泉滙南北諸山之水而注於上下  
兩塘之河其流甚長其利斯溥唐宋以來屢經濬

治而興廢不常

盛朝特重水利首及東南疏鑿之功為前古未有恭紀  
聖恩垂利萬世而歷代開濬始末悉詳著於篇志水利  
西湖古稱明聖湖漢時有金牛見湖人言明聖之瑞  
因名又以其在錢塘故稱錢塘湖又以其輪委於

下湖故稱上湖其地負會城之西故通稱西湖漢書地理志錢唐有武林山武林水所出水經注錢唐縣南江側有明聖湖父老傳言湖有金牛古見之神化不測湖取名焉宋史河渠志西湖周迴三十里源出於武林泉洪武杭州府志武林諸水自四山而下者合流於明聖湖卽今之西湖也西湖遊覽志西湖三面環山谿谷縷注下有淵泉百道水瀦而爲湖蓋諸山之脈皆宗天目山蜿蜒東來若翔若舞萃於錢塘而峭崿於天竺從此而南而東則爲龍井爲大慈爲玉岑爲積慶爲南屏爲龍山鳳山吳山皆謂之南山從此而北而東則爲靈隱爲仙姑爲履泰爲寶雲爲巨石皆謂之北山南山之脈分爲數道貫於城中而其外邏則自龍山沿江而東環沙河而包括露骨於茅山艮山者皆其護沙也北山之脈分爲數道貫於城中而其外邏則自霍山繞湖市半道紅衝武林門露骨於武林山皆其護沙也潮擊海門而上晝夜再至山奔水導而逆以海潮則氣脈不解南北諸山崢嶸迴繞

滙為西湖洩惡停深若練若鏡其水灌溉沿湖之田形勝關乎郡城餘波潤於下邑豈直為魚鳥之藪遊覽之娛哉

歷代開濬始末

唐代宗時李泌刺杭州閔錢塘瀕海市民苦江水鹵惡難以安土始鑿六井開陰竇引湖水以資民汲民甚利之唐書李泌傳代宗時泌為常袞所忌出為杭州刺史有風績咸淳臨安志六井相國井在甘泉坊側近井亭橋西井一名化成井在相國祠前水

口在安國羅漢寺前 方井俗呼四眼井在三省激賞

酒庫西今在舊府藏西白龜池此水不可汲只可防虞水口在玉

蓮堂北 小方井俗呼六眼井在錢塘門內裴府前

金牛井今廢

長慶初刺史白居易重修六井螿函筓鍾洩湖水溉瀕河之田唐書白居易傳居易雖進忠不見聽乃勾外遷為杭州刺史始築隄捍錢塘湖鍾洩其水溉田千頃復浚李泌六井民賴以汲李商隱白公墓碑公貶杭州既至築隄捍江分殺水孔道用肥



見田發故鄴侯泌六井淳儲甘清以變飲食易居

塘湖石記錢塘湖一名上湖北有石函南有筭凡放水溉田每減一寸可溉十五餘頃每一復時可溉五十餘頃先須別選公勤軍吏二人立於田次與本所由田戶據頃畝定日時量尺寸節限而放之若歲旱百姓請水須令經州陳狀刺史自便押帖所由即日與水若待狀入司符下縣縣帖鄉鄉差所由動經旬日雖得水而旱田苗無及也大抵此州春多雨秋多旱若隄防如法蓄洩及時即瀕河干餘頃田無凶年矣自錢塘至鹽官界應溉夾官河田須放湖水入河從河入田淮鹽鐵使舊法又須先量湖水淺深待溉田畢即還本水尺寸往亦隨加即不啻足矣脫或不足即更決臨平湖添注官河又有餘矣俗云決放湖水不利錢塘縣官菱菱失其利且魚龍與生民之命孰急菱菱與稻

梁之利孰多斷可知矣又云放湖即郭內六井無水亦妄也且湖底高井管低湖中又有泉數十眼湖耗則泉湧雖盡竭湖水而泉用有餘況前後放湖終不致竭而云井無水謬矣其郭中六井李泌相公典郡日所作甚利於人與湖相通中有陰竇往往堙塞亦宜數察而通理之則雖大旱而井常足湖中有無稅田約十數頃湖淺則田出湖深則田沒田戶多與所由計會盜洩湖水以利私田其石函南筭并諸小筭非澆田時並須封閉築塞數令巡檢小有漏洩罪責所由即無盜洩之弊矣又若霖雨三日已上即往往隄決須所由巡守為之預防其筭之南舊有缺岸若水暴漲即於缺岸洩之又不減兼於石函內筭洩之防隄潰也大約水去石函口一尺為限過此須洩之子在郡三年仍歲逢旱湖之利害盡究其由恐來者要知故書於石欲讀者易曉故不文其言白居易別州民詩耆老遮歸路壺漿滿別筵甘棠無一樹那得淚潸然稅重多貧戶農饑足旱田惟留一湖水與汝救荒

年自注今春增築錢塘湖隄貯水防天旱故云

五代時西湖歲久不修湖葑蔓蔽吳越王錢氏置軍千人專治湖又疏湧金池以入運河宋史河渠志

錢氏有國始置撩湖兵士千人專一開濬夢梁錄

湧金池在豐豫門即湧金門內引西湖水為池吳越王

元瓘書湧金池三字刻石識之

錢氏歸命後廢撩湖兵士湖復不治宋景德末王濟

以工部郎中知杭州命工開濬宋史王濟傳郡城

西有錢塘湖溉田千餘頃歲久湮塞濟命濬治增

置斗門以備潰溢之患仍以白居易舊記刻石於

側

天禧時王欽若奏請西湖為放生池禁民採捕見王隨放

生池慶曆時湖葑日塞鄭戩知杭州復濬之宋史

鄭戩傳慶曆元年戩知杭州時錢塘湖葑土湮塞

為豪族僧坊所占冒湖水益狹戩發屬縣丁夫數

萬闢之事聞詔本郡歲治如戩法

嘉祐中知州事沈邁作南井以補金牛之缺人稱沈

公井後亦名咸淳臨安志沈文通嘗作南井引西

湖水入城以便民汲人呼為沈公井按南井在三  
 橋西金文河酒庫北水口在豐豫門外龍王堂前  
 分入宋史沈邁傳邁知杭州明於吏治令行禁止  
 禁民捕西湖魚鼈

熙寧中六井及沈公井俱廢知州陳襄命工討其源  
 流濶而整之歲旱不能為害咸淳臨安志杭雖號  
 水鄉而其地斥鹵可食之水常不繼唐相國李長  
 源舊為六井引西湖以飲民井久廢不修水遂不  
 應民用襄命工討其源流濶而整之井遂可食雖

遇旱歲民用沛然蘇軾錢塘六井記潮水避錢塘  
 斥鹵化為桑麻之區而久乃為城邑聚落凡今州  
 之平陸皆江之故地其水苦惡惟負山鑿井乃得  
 甘泉而所及不廣唐宰相李公長源始作六井引  
 西湖水以足民用後刺史白公樂天治湖浚井刻  
 石湖上至今賴之始長源六井其最大者在清湖  
 中為相國井其西為西井少西而北為金牛池又  
 北而西附城為方井為白龜池又北而東至錢塘  
 縣治之南為小方井而金牛之廢久矣嘉祐中太  
 守沈公文通又於六井之南絕河而東至美俗坊  
 為南井出湧金門並湖而北有水閘三注以石溝  
 貫城而東者南井相國方井之所從出也若西井  
 則相國之派別者也而白龜池小方井皆為匿溝  
 湖底無所用闢此六井之大略也熙寧五年秋太  
 守陳公述古始至問民之所病皆曰六井不治民  
 不給於水南井溝庫而井高水行地中率常不應  
 公曰嘻甚矣吾在此可使民求水而不得乎乃命

僧仲文子珪又引其徒如正思坦以自助凡出力以佐官者二十餘人於是發溝易整完輯罅漏而相國之水大至坎滿溢流南注於河千艘更載瞬息百斛以方井為近於濁惡而遷之少西不能五步而得其故基父老驚曰此古方井也民李甲遷之於此六十年矣疏湧金池為上中下使澣衣浴馬不及於上池而列二閘於門外其一赴三池而決之河其一納之石檻比竹為五管以出之並河而東絕三橋以入於石溝注於南井水之所從來高則南井常厭水矣凡為子閘四皆垣牆局鑄以護之明年春六井畢修而歲適大旱自江淮至浙東井皆竭民至以器缶貯水相餉如酒醴而錢塘之民肩足所任舟楫所及南出龍山北至長河鹽官海上皆以飲牛馬給沐浴方是時汲者皆誦佛以祝公余以為水者人之所甚急而旱至於井竭非歲之所常有也以其不常有而忽其所甚急此天下之通患也豈獨水哉故詳其語以告後之人使雖至於久遠廢壞而猶有考也

元祐四年龍圖閣學士蘇軾知杭州奏請救荒餘錢萬緡糧萬石及百僧度牒募民開湖葑草盡除湖乃大治宋史蘇軾傳時西湖葑積為田漕河失利取給江湖舟行多淤三年一淘為民大患六井亦幾於廢軾見茆山河專受江湖鹽橋河專受湖水遂濬二河以通漕復造堰牖以為湖水蓄洩之限以餘力完六井又取葑田積湖中南北徑三十里為長隄以通行者吳人種菱春輒芟除不遺寸草募人種菱湖中葑不復生歲取其利以備修湖杭

民家有畫像飲食必祝又生作祠以報

蘇軾乞開杭州西湖

狀杭州之有西湖如人之有眉目蓋不可廢也唐

長慶中白居易為刺史方是時湖溉田千餘頃及

錢氏有國置撩湖兵士千人日夜開浚自國初以

來稍廢不治水涸草生漸成葑田熙寧中臣通判

杭州湖之葑合者蓋十二三耳而今十六七年之

間遂堙塞其半父老皆言十年以來水淺葑積如

雲翳空倏忽便滿更二十年無西湖矣使杭州無

西湖如人去其眉目豈復為人乎臣愚無知竊謂

西湖為放生池禁捕魚鳥為人主祈福每歲四月八

日郡人數萬會於湖上所活毛羽鱗甲以百萬數

皆西北向稽首仰祝萬壽若一旦堙塞使蛟龍魚

鼈同為枯轍之鮪臣子坐觀亦何心哉此西湖不

可廢者一也杭之為州本江海故地水泉鹹苦居

民零落自李泌引湖水作六井然後民足於水井

邑日富百萬生聚待此而後食今湖狹水淺六井

漸壞若二十年後盡為葑田則舉城皆食鹹苦其

勢必自耗散此西湖不可廢者二也白居易作石

面記云放水溉田瀕河千頃可無凶歲今雖不及

千頃而下河數十里菱菱穀米所獲不貲此西湖

不可廢者三也西湖深濶則運河可取足於湖水

若湖水不足則必取足於江湖所過泥沙渾

濁一石五斗不出三歲輒調兵夫十餘萬開濬而

舟行市中蓋十餘里士卒騷擾泥水狼藉為居民

大患此西湖不可廢者四也天下官酒之盛未有

如杭州者也歲課二十餘萬緡水泉之川仰給於

湖若湖漸淺狹水不應溝則當勞人遠取山泉歲

不下二十萬工此西湖不可廢者五也臣輒已差

官打量湖上葑田計二十五萬餘丈度用夫二十

餘萬工近者伏蒙陛下以本路饑饉特寬轉運司

上供額斛五十餘萬石出糶常平米亦數十萬石

又特賜本路度牒三百而杭當得百道臣謹以聖

折之餘尚得錢米約共一萬餘貫石臣輒以此錢

意增價召人中米減價出賣以濟饑民而增減耗

水利一

募民開湖度可得十萬工自今四月二十八日興  
 工農民父老縱觀太息以為陛下既捐利與民活  
 此一而方而又以其餘與久廢無窮之利使數千人  
 得食其力以度此凶歲蓋有泣下者臣伏見民情  
 如此而錢米有限所募未廣葑合之地尚有大半  
 若來者不繼則前功復棄深可痛惜若更得度牒  
 百道則一舉募民除去淨盡不復遺患矣陛下察  
 臣五不可廢之狀利害較然特出聖斷別賜臣度  
 牒五十道仍飭轉運提刑司於前來所賜諸州二  
 百道內契勘賑濟支用不盡者更撥五十道價錢  
 與臣通成一百道使臣得盡力畢工半年之間自  
 見西湖復唐之舊環三十里際山為岸則農民父  
 老與羽毛鱗介同沐聖澤無有窮已臣不勝大願  
 謹錄奏聞伏候敕旨 賜黃目下浙中梅雨葑根  
 浮動易為除去及六七月大雨時行利以殺草芟  
 夷蘊崇使不復滋蔓又浙中農民皆言八月斷葑  
 根則死不復生伏乞聖慈早賜開允及此良時興  
 工不勝幸甚 又賜黃本州自去年至今開濬連

河引西湖水灌注其中今來開除葑田逐一利害  
 臣不敢一煩瀆天聽別具狀申三省去訖蘇軾  
 申三省起請開湖六條狀於熙寧中通判杭州  
 訪問民間疾苦父老皆云苦運河淤塞遠則五年  
 近則三年率常一開濬不獨勞役兵民而運河自  
 州前至北郭穿闔閩中蓋十四五里每將興工市  
 肆洶動公私騷然自胥吏壕寨兵給等皆能恐喝  
 人戶或云當於某處置土某處過泥水則居者皆  
 有失業之憂既得重賂又轉而之他及工役既畢  
 則房廊邸舍作踐狼藉園囿隙地成邱阜積雨  
 蕩濯復入河中居民患厭未易悉數若三五失  
 開則公私壅滯以尺寸水行數百斛舟人牛力盡  
 跬步千里雖監司使命有數日不能出郭者其餘  
 艱阻固不待言問其所以頻開屢塞之由皆曰龍  
 山浙江二閘日納潮水泥沙渾濁一汎一淤積日  
 稍久便及四五尺其勢當然不足怪也父老又言  
 錢氏有國時郡城之東有小堰門既云小堰則容  
 有大者昔人以大小二堰隔絕江水不放入城則

城中諸河專用西湖水水既清澈無由淤塞而餘  
 杭門外地名半道紅者亦有堰名清湖意亦愛惜  
 湖水不令走下自天禧中故相王欽若知杭州始  
 壞此堰以快目下舟楫往來今七十餘年矣以意  
 度之必自此後湖水不足用而取足於江湖又況  
 今者西湖日就堙塞而昔之水面半為葑田霖潦  
 之際無所蓄流溢害民而旱乾之月湖自減涸  
 不能復及運河謹按唐朝長慶中刺史白居易浚  
 治西湖作石函記其略曰自錢塘至鹽官界應溉  
 夾河田者皆放湖水入河自河入田每減一寸可  
 溉十五頃每復時可溉五十頃若隄防如法蓄  
 洩及時則瀕河千頃無凶年矣由此觀之西湖之  
 水尚能自運河人田以溉千頃則運河足用可知  
 也軾於是時雖知此利害而講求其方未得便安  
 今者蒙恩出典此州自去年七月到任首見運河  
 乾淺使客出入艱苦萬狀穀米薪芻亦緣此暴貴  
 尋剗刷捍江兵士及諸色廂軍得一千人自十月  
 興工至今年四月終開浚葑山鹽橋二河各十餘

里皆有水八尺以上見今公私舟船通利父老皆  
 言自三十年以來開河未有若此深快者也然潮  
 水日至淤填如舊則三五年前功復棄軾方講  
 求其策而臨濮縣主簿監在城商稅蘇堅建議曰  
 江潮灌注城中諸河歲月已久若遽用錢氏故事  
 以堰開御之令自城外轉過不惟事體稍大而潮  
 面葑合積水不多雖引入城未可全恃宜參酌古  
 今且用中策今城中運河有二一曰葑山河南抵  
 龍山浙江開口而北出天宗門一曰鹽橋河南至  
 州前碧波亭下東合葑山河而北出餘杭天宗二  
 門東西相望不及三百步二河合於門外以北抵  
 長河堰下今宜於鈴轄司前創置一閘每遇潮上  
 則暫閉此閘令龍山浙江潮水清然後開閘則鹽橋一  
 宗門候一兩時辰潮平水清然後開閘則鹽橋一  
 河通闡闡中者永無潮水淤塞開閘則鹽橋一  
 葑山河縱復淤填乃在人戶稀少村落相半之中  
 雖不免開淘而泥土有可堆積不為人患潮水自  
 葑山河行十餘里至梅家橋下始與鹽橋河相通

湖已行遠泥沙澄墜雖入鹽橋河亦不淤填茆山  
 河既日受潮水無緣涸竭而鹽橋河底低茆山  
 底四尺則鹽橋河亦無涸竭之理然猶當過慮以  
 備乏水今西湖貫城以入於清湖河者大小凡五  
 道皆自清河而下以城北出餘杭門不復與城中  
 河相灌輸此最可惜宜於湧金門內小河中置一  
 小堰使暗門湧金門二道所引之水入法慧寺東  
 溝中承天寺東之溝又南行九丈復鑿為新溝  
 達於承天寺東之溝又南行九丈復鑿為新溝  
 一百有七丈以東入於鹽橋河則咫尺之近矣此  
 口入新水門以入於鹽橋河則咫尺之近矣此  
 下流則江湖清水之所入上流則西湖活水之所  
 注承無乏絕之憂矣而湖水所過皆闢曲折之  
 間宜作石櫃貯水使民得汲用澣濯且以備火災  
 其利甚博此所謂參酌古今而用中策也軾尋以  
 堅之言使知仁和縣事黃侯相度可否又率僚吏  
 躬親驗視一仁如堅言可成無疑也謹以四月  
 二十日興工開導及作堰閘且以餘力修完六井

皆不過數月可以成就有合行起請事件謹具畫  
 一如左一今來所創置鈐轄司前一閘雖每遇  
 湖上閉閘一兩時辰而公私舟船欲出入閘者自  
 須先期出入必不肯端坐以待閉閘更兼有茆山  
 一河自可通行以此實無阻滯之患而能隔截江  
 潮徑自茆山河出天宗門至鹽橋一河永無湮塞  
 開淘豎擾之患為利不小恐來者不知本末以阻  
 滯為言輕有變改積以歲月舊患復作今來起請  
 新置鈐轄司前一閘遇潮上閉訖方得開龍山浙  
 江閘候潮水平清方得卻開鈐轄司前閘一鹽  
 橋運河岸上有治平四年提刑元積中所立石刻  
 為人戶屋舍侵占牽路已行除拆外具載濶狹丈  
 尺今方二十餘年而兩岸人戶復侵占牽路蓋屋  
 數千間卻於屋外別作牽路以復河道日就淺窄  
 準此據理並合拆除木州方行相度而人戶相率  
 經州乞據逐人家後丈尺各作木岸以護河隄仍  
 據所侵占地量出賃錢官為椿管準備修補木岸  
 乞免拆除屋舍本州已依狀施行去訖今來起請



應占牽路人戶所出賃錢並送通判廳收管準備  
 修補河岸不得別將支用如違並科違制一自  
 來西湖水面不許人租佃惟葑葑之地方許請賃  
 種植今來既將葑田開成水面須至給與人戶請  
 佃種菱深慮歲久人戶日漸侵占舊來水面種  
 官司無由覺察已指揮本州候開湖了日於今來  
 新開界土立小石塔三五所相望為界亦須至立  
 條約束今來起請應石塔五丈以內水面不得請  
 侵占種植如違許人告每丈賞錢五貫文着以犯  
 人家財充一湖上種菱人戶自來鬻割葑地如  
 田墜狀以為疆界緣此積漸葑戶自來鬻割葑地  
 起請應種菱人戶只得標插竹木為四至不得以  
 變葑為界如違亦許人割賃竹木為四至不得以  
 來收西湖葑草蕩課利錢四百五十四貫充公使  
 今來既開葑葑盡變為菱蕩給與人戶租佃即今  
 後課利亦必稍增若撥入公使庫未為穩便今來  
 起請欲乞應西湖上新舊菱蕩課利並委自本州  
 量立課額今後永不得增添如人戶不切除治致

有草葑即許人割賃其割賃人特與權免三年課  
 謂之開湖司公使庫更不得支用錢塘縣尉收管  
 開葑撩淺如敢別將支用並科違制一錢塘縣  
 尉解宇在西湖上今來起請今後差錢塘縣尉銜  
 內帶管開湖司公事常切檢點纔有葑葑即依法  
 施行或支開湖司錢物雇人開撩替日委後任檢  
 點交割如有葑葑不切除治即申所屬點檢申吏  
 部理為違制以上條件並刻石置知州及錢塘縣  
 尉廳上常切點檢蘇軾開湖禱吳山水仙五龍王  
 廟文杭之西湖如人之有目湖生葑葑如目之有  
 翳翳久不治目亦將廢河渠有膠舟之苦鱗介失  
 解網之惠六池化為智井千頃無復豐歲矣是用  
 因賑卹之餘資興開鑿之利勢百日奏功所患者  
 淫雨千夫在野所憂者疾癘庶神明之陰相與人  
 謀而協濟魚龍前導以破堅菰葦解坼而迎銳復  
 有唐之舊觀盡四山而為際澤斯民於無窮宜事  
 神之益勵我將大合樂以為報豈徒用樽酒之薄

祭也蘇軾謝吳山水仙五龍王廟祝文西湖湮塞積歲之患坐閱百吏熟視而歎惟愚無知妄謂非難禱於有神陰假其便不愆於素咸出幽贊大隄雲橫老葑席捲歷時未幾功已過半嗣事告終來哲所善神卒相之罔拂民願肴酒之報我愧不腆釋道潛次韻吳承老推官觀開西湖詩偉人謀議不求多事定紛紜絕唯阿盡放龜魚還淥淨肯容蕭葦障前陂一朝美事誰能記百尺蒼崖尚可磨天上列星當亦喜月明時下浴清波蘇軾乞子珪師號狀杭州平陸本江海故地惟負山乃有甘泉其餘并皆鹹苦唐刺史李泌始引西湖水作六井其後白居易亦治湖濬井以足民用嘉祐中知州沈邁增置一大井在美俗坊今謂之沈公井最得要地四遠取汲而創始滅裂水常不應至熙寧中六井與沈公井皆廢壞知州陳襄選差僧仲文子珪如正思坦四人董治其事修濬既畢歲適大旱民足於水為利甚溥臣為通判親見其事經今七八年沈公井復壞終歲枯涸民去水遠者率以七

入錢買水一斛而軍營尤以為苦臣尋訪熙寧中修井四僧而三人已亡獨子珪在年已七十精力不衰問沈公井復壞之由子珪云熙寧中雖已修復然不免以竹為管易致廢壞遂壁畫用瓦筒盛以石槽底蓋堅厚銅捍周密水既足用永無壞節又於六井中控制引餘波至仁和門外及威果雄節等指揮五營之間創為二井皆自來去井最遠難得水處西湖甘水殆遍一城軍民相慶若非子珪心力才幹無緣成就緣子珪先已蒙恩賜紫欲乞特賜一師號以旌其能者右臣體問得靈石多福院僧子珪委有戒行自熙寧中及今兩次選差修井營幹勞苦不避風雨顯有成效如蒙聖恩賜一師號即乞以惠遷為號取易所謂井居其所而遷之義謹錄奏聞伏候敕旨

南渡後郡為行都衣冠畢會商賈雲集雖無恢復遠略而言水利者歷世多有紹興初守臣張澄請開

西湖繼守臣湯鵬舉奏請重開均著治績宋史河渠志紹興九年知臨安府張澄奏請招置廂軍兵士二百人委錢塘縣尉兼領其事專一濬湖若包占種田沃以糞土重置於法從之咸淳臨安志紹興八年澄再知臨安府五月浚臨安府運河宋史高宗本紀紹興十六年濬運河咸淳臨安志紹興十九年以西湖近來穢濁堙塞詔郡守湯鵬舉措置遂用工開撩及修砌六井陰竇水口增置斗門閘板量度水勢通放入井且條具事宜湯鵬舉撩湖事宜

檢准紹興九年八月指揮許本府招置廂軍兵士二百人見管止有四十餘人今已措置撥填奏及原額蓋造寨屋舟船專一撩湖不許他役一契勘紹興九年八月指揮差錢塘縣尉兼管開湖職事臣今欲專差武臣一員知通逐時檢察庶幾積日累月開撩不致依舊堙塞一契勘西湖所種芡菱往往於湖中取泥葑夾泥糞穢包墜根種及不時澆灌穢汚紹興十七年六月申明今後永不許請佃栽種今來又復重置蓮荷填塞湖港臣已遣蓮荷租課官錢並已除放訖如有違犯之人科罪追償有官人具申朝廷取旨施行

乾道時臨安居民日盛河流漸隘舟楫病之安撫周淙請開運河疏濬西湖重修六井一倣蘇軾遺法宋史河渠志乾道四年守臣周淙出公帑錢招集

游民開濬城內外河疏通淤塞人以治辦稱之宋  
 史河渠志乾道五年守臣周淙言西湖水面惟務  
 深濶不容填溢并引入城內諸井一城汲用尤在  
 涓潔舊招軍士止有三十餘人今宜增置撩湖軍  
 兵以百人為額專一開撩或有種植芟芟因而包  
 占增壘隄岸坐以違制從之咸淳臨安志淙言西  
 湖惟務深濶涓淨累降指揮禁止汙穢今欲撩湖  
 增置軍兵百人專委錢塘縣尉并壕寨官一員於  
 階位內帶主管開湖管轄軍兵不住開撩不許妄

有請佃包占或有違戾依蘇軾申請以違制論從  
 之周淙修六井記乾道三年五月淙自兩浙轉運  
 使改知臨安府越明年狴狂屢空經費稍裕乃  
 以暇日披圖牒考風俗思欲與都人為不朽之利  
 而脩井之役始興惟六井自熙寧五年太守陳公  
 實始改作蘇公通守為記其事元祐五年蘇公自  
 禁林出守是邦相距纔十八年而井已廢壞於是  
 改用瓦筒石槽自元祐至今八十年率多湮涸白  
 龜池且為大姓所據淙念此邦為東南都會生齒  
 阜繁況今輦轂所駐四方輻輳百司庶府千乘萬  
 騎資於水者十倍昔時倘廢而不治豈不為民病  
 仰惟聖主惟民是念淙奉德意不敢循默因奏於  
 上面奉玉音遂以六月己亥經始於惠遷井易用  
 新石堅厚高廣過昔數倍以次至方井相國井白  
 龜池而蘇公所記之六井畢修蔽捍周密可支數  
 百歲水脈大至率皆盈溢則又治古井之有泉者  
 曰瑞石曰中棚曰義井曰清明牖井城之內外莫

不足於水矣竊惟此邦懷蘇公之德逮今不忘既  
踵公舊規再治六井因訪求熙寧間舊本記文刻  
之井上而書歲月於其後使億萬生聚知是井之  
修蓋奉聖天子之命而遵蘇公之規守臣何力之  
有宋史河渠志二十九年臨安守臣言西湖冒佃  
侵多葑菱蔓延西南一帶已成平陸而瀕湖之民  
每以葑草圍裏種植荷花駸駸不已恐數十年後  
西湖遂廢將如越之鑑湖不可復矣乞一切芟除  
務令淨盡禁約居民不得再有圍裏從之

淳熙時張杓知臨安興水利不避權要治法略如周  
淙咸淳臨安志淳熙十二年張杓以兩浙轉運副  
使知臨安府置修江卒以禦潮疏積年湖壅三閘  
六井一一修復十六年杓以權兵部尚書再兼知  
臨安府時有內侍毛伯益占西湖菱池爲亭與外  
戚家輿僕以刃交手爭獄具夤緣宣諭求免罪杓  
曰吾官可去法不可屈執奏論如律

淳祐咸淳間以治水著者守臣爲趙與憲爲潛說友  
御史爲鮑度相繼開浚終宋之世湖無壅淤之患  
夢梁錄淳祐丁未大旱湖水盡涸郡守趙與憲奉  
朝命開濬自六井至錢塘上船亭西冷橋北山第

一橋蘇隄三塔南新路長橋柳洲寺前等處凡種菱荷芰蕩一切薙去方得湖水如舊夢梁錄淳祐年西湖水涸城內諸井亦竭京尹趙與憲給官錢米命工自錢塘尉解北望湖亭下鑿渠引天目山水自餘杭河經張家渡河口達於溜水橋斗門凡作數壩用車運水經西湖庶得流通城中諸市民賴其利也夢梁錄咸淳四年守臣潛說友申請於朝乞行除拆湖中菱荷毋得存留穢塞侵占湖岸之間咸淳臨安志清湖河疏引西湖之水雖潮汛

所不到亦以淤塞相習工力不時隄圯水涸行者舟者胥以爲病咸淳六年朝廷始命安撫潛說友措置開修一自斷河至清湖橋凡四千二百一十尺一自觀橋西至楊四姑橋凡二千三百三十五尺淺者浚狹者拓圯者築缺者補隄以堅木墊以巨石闌垣門步煥然一新徑術坦夷人行砥上斷河地近吳山每大雨流潦挾草壤雜至乃卽其處穿海子口深三丈餘置鐵窗櫺以醜之使浮穢不入於海置澄水閘以限之使惡流不入於河夾河

人家濯清挹潔與濱湖無異魚蝦至游泳其中觀  
 橋西連禮闈太乙宮舊沿河皆矮土牆乃易以甃  
 石中貫以木其高七尺餘袤以尺計者一千九百  
 八十皆前所未有也續有旨宗陽宮前沿河併行  
 修築凡二百七十七丈又因申警防虞復命說友  
 卽和寧門外河之上流開洶爲積水計自登平橋  
 至六部橋凡四十丈海子口居四其上磴砌版築  
 置水閘闢水門工役一視諸河而有加焉盧鉞修  
 井記六  
 府以修爲功而水居其一蓋生人所資以養有一  
 日不容闕焉者凡邦國都鄙稍甸郊里之地必有

井焉以濟其日用飲食故曰井養而不窮杭爲東  
 南一大都會左江右湖民物阜繁厥初因沙塘奠  
 厥攸居故不難於得水然今之融液者常苦惡不  
 若湖之爲甘且美也蓋江與海通波湖則受衆山  
 流泉而瀦之味之不同也亦宜唐刺史李鄴侯泌  
 始作六井引茲水以足民用迨熙寧王子陳公襄  
 因其舊而脩之元祐庚午蘇公軾又修之於以見  
 六井者杭人之所利賴矧南渡駐蹕以來百司庶  
 府六軍萬姓仰於水者視昔何啻百倍乾道間周  
 龍圖淙詢民之欲踵蘇之規而深致力焉蓋百有  
 餘年於此矣咸淳之六年太傅平章魏公任軍國  
 重事朝廷清明宮府一體彈壓輦下今時則易然  
 也夫旣處時之易而復受任之久故衆廢具舉而  
 功始及於井曰惠遷者溝底爲河泥不可食覓舊  
 用木歲久輒壞乃培而高之復治石爲渠以尺計  
 一千七百有奇表捍裏錮旣廣旣深水始大至覆  
 之巨石而竅其上用汲流溢而南至於金文橋之  
 河舟者載以漸焉民且饜水矣然猶慮衆流之合

汗也乃浚受水海以澄其源乃鑿別溝以疏其惡  
 旁立神祠置守者遠汗漫也西井舊有亭宇經毀  
 不存今鼎新如惠遷以至相國南井大方小方水  
 口之所自入莫不表而出之流福居六井之外於  
 府治為近其源自聚景園導湖灌輸後填淤成陸  
 堙廢滋久乃自學士橋別開大港水脈以通他如  
 衆河之支分派別壅者疏之狹者廣之石梁之圯  
 者改造之隄岸之夷者培築之而又推本六井之  
 攸始於是鄴侯之廟隘而拓之大卑而增之崇像  
 設儼如塗艘煥如過者改視工告設備尹以修水  
 本末諒俾為記鉞作而言曰人非水不生活水非  
 井不甘潔在易井之六四曰井甃无咎修井也誠  
 齋楊氏釋之曰大哉井之有功於斯人乎大哉修  
 之有功於斯井乎尹能於剗裁之暇汲汲以修井  
 為務蓋得聖經賢傳之旨矣以予觀之井之為井  
 有二自天一生水而坎之中畫自乾來掘地九仞  
 而得泉此自然之井也六井則異是穴平地以為  
 凹池取諸西湖而注之此使然之井也其功大其

費夥其利於民也溥法宜書尹姓潛名說友括蒼人夢梁錄咸淳中御史鮑

度劾奏內臣陳敏賢劉公正包占水池蓋造屋宇  
 濯穢洗馬無所不施切念灌注湖水一以醞酒以  
 祀天地饗祖宗今以不得蠲潔而虧歆受之福次  
 以一城黎元之生俱飲汗膩濁水而起疾疫之災  
 奉旨降官罷職令臨安府拆毀屋宇開闢水港於  
 湖中除拆蕩岸得以無穢汗之患并令官府除其  
 年納利租官錢消滅其籍絕其所蒔本根不復萌  
 矣



謹按宋以前爭言治井由江與城近民患斥鹵故也後江勢漸狹如江中羅刹石極險後漸為潮沙所沒可証而城中新開甘井日多不專藉六井沈公井矣故元以後不及治井事

有元一代嘗開候潮門以南運河及龍山河而守令

治西湖者無人湖遂廢而不治故元史河渠志不

及西湖元史世祖本紀至元二十五年二月辛巳

以杭州西湖為放生池二十八年弛杭州西湖魚

鳥禁聽民網罟成化杭州府志元時不事濬湖沿

邊泥淤之處沒為菱田荷蕩屬於豪民湖西一帶

葑草蔓合侵塞湖面如野陂然

至正六年丞相脫脫率達世帖穆爾開候潮門以南

運河及龍山河

蘇天爵江浙行省浚治杭州河渠記至正六年十月江浙行中書省

始命浚治杭州郡城河渠明年二月卒事宰相慎於出令僚吏勤於督工庶民樂於趨役於是河流環合舟航徑行商旅由遠而至食貨之價不翔稚髦莫不皆喜公私咸以為利矣又明年天爵承命參預省政幕府奧林請記其事於石古者立國居民則恃山川以為固大江之南其城郭往往依乎川澤又為溝渠以達於市井民欲引重致遠必賴舟楫之用歲月既久壘無湮涸則加浚治之功焉然勞民傷財昔人所戒重藩省者必得清慎之人知愛民為本則能倡其眾官郡縣者必得廉能之官知奉公為職則能集其事否則克有成功者鮮矣杭州為東南一大都會山川之盛跨吳越閩浙之遠兼荆廣川蜀之饒郡西為湖昔人釀渠引水入城聯絡巷陌凡民之居前通闌闔後達河渠舟

帆之往來有無之貿易皆以河為利或時填淤居者行者胥以為病在上者日理政務有不屑為長民者壓於大府不敢擅為觀望因循天下之事日漸廢壞有志於當世者可不為之慮乎歲在乙酉天子念東南貢賦之煩勞閱民生之彫敝詔命國王丞相行江浙省事王威儀有度中外具瞻又命翰林學士承旨達世帖穆爾為平章政事公讀書守法不矜不揚曾未數月百度修舉乃詢民利病眾以河渠不治為言丞相咨於官僚而胥合謀於憲府而僉同平章公總其事於上檢校官李益杭州路總管趙璉董其役於下又以掾曹十餘人分治其工南起龍山北至猪圈壩延袤三十餘里尋以冬寒止役春復役之郡中郭外支流二十餘里其深三尺廣仍其舊悉導湖水注之為役四萬二千五百工用鈔八萬五千貫復慮上出塗泥值雨入河命諸寺載而積諸江汭又新木閘者四石梁者一防吏之為奸嚴以煩擾之禁公治事少暇親行河上以撫慰之以故人忘其勞事克以集嘗

聞自昔有天下者皆立法制以維持之又選材能以奉行之至於封疆城郭各有官司掌其厲禁是以修治有方啟閉有時大小得職民物安堵況治水者當行其所無事則績用有成而鹵莽滅裂之徒或者力欲僥倖覬一時之功未有不為民患者也觀夫杭州浚治河渠之事宰輔謀猷之賢任人嚴謹作事周密誠足以為後世之法哉故備述之俾來者尚勿廢前人之功永為一方之利也與

明初仍元之舊西湖漸成平田遂起稅額向所稱以山為岸者去山日遠成化杭州府志西湖百餘年來居民寺觀實為已業六橋之西悉為池田桑埭裏湖西岸亦然中僅一港通酒船耳孤山路南東至城下直抵雷峰塔迤西皆然

景泰七年六月鎮守浙江兵部尙書孫原貞建議築  
修西湖二閘明臣議開西湖自原貞始英宗實錄  
孫原貞奏曰杭州西湖舊有二閘蓄洩水利近者  
閘圯湖淤積有葑灘往往勢豪之人占據水塞不  
通居民不便而一應魚課累年魚戶賠納臣近閱  
誌內載蘇軾奏疏云杭之爲州本江海故地水泉  
鹹苦自唐李泌引湖水入城爲六井然後民足於  
水井邑日富百萬生聚待此而食放水溉田瀕河  
千頃可無凶歲運河亦皆取足於湖不可許人租

佃水面侵占種植周淙亦言西湖所貴深濶引水  
入城中諸井尤在涓潔因禁止栽植菱芡招兵二  
百人專一撈湖其後有力之家又復請佃湖面日  
益填塞及後大旱水涸詔郡守趙與憲開濬凡菱  
荷芡蕩悉薙去之杭民獲利此皆前代經理西湖  
大略也邇歲豪勢之徒日逐堆疊塍圍包占種植  
菱藕蓄養鮮魚時遇乾旱湖已先涸旁田旣無灌  
溉之利而運河亦遂淤淺公私舟船往來不通近  
與鎮守少監阮隨詢之父老合詞陳情仍舊置閘

蓄洩水利革民圈占使湖得深廣周通六井支流  
運河旁溉田畝且無漁戶賠課之擾已令有司勘  
復所占池蕩並令償官而築修二閘勢不可緩嘗  
與阮隨勸借賑濟之餘尙存米穀可備木石之費  
及時僦工俾令脩築乞敕有司於農隙之時量工  
開濬禁止豪右不許侵占湖利則一郡軍民永遠  
便利矣該部如所言行之

成化中官兩浙者自都御史至郡守每議興西湖水  
利雖或格於浮議或設施未竟而前作後承漸見  
功緒萬曆杭州府志宣德正統間或倡濬湖之議  
憚更版籍竟致閣寢嗣是都御史劉敷御史吳文  
元奏復西湖而浮議蠡起有力者百計阻之憲宗  
實錄成化十一年秋七月工部覆奏疏浚杭州西  
湖許之西湖之水自唐杭州刺史李泌白居易於  
城西鑿渠導入城中運河溉及仁和海甯上塘之  
田其利甚溥宋守臣蘇軾復鑿渠九道以疏浚之  
後漸湮塞居民侵以爲業渠失故道田無所溉動  
輒告災至是浙江布政使甯良按察司副使楊瑄

等僉議錢塘門左湧金門右其間有九渠之一宜  
因其舊跡疏浚爲河構石爲橋以通湖水外置一  
閘時其啟閉以禦橫流庶水利可復鎮守浙江太  
監李義上其議其事得行民頗利焉成化杭州府  
志成化十二年湧金門北創開水門通導西湖水  
自柳洲寺後入城由曲阜橋達城河門深四丈五  
尺高九尺置鐵窗櫺障隔內外門內外各爲橋上  
並濶一丈下濶視水門而高則減二尺外橋下又  
爲閘板以防暴漲楊守陳楊瑄墓誌西湖舊深廣  
能溉諸邑田至五十六萬頃淤漚過半奏請浚深  
之於湧金門北闢水門放湖流入城河出清湖閘  
抵海寧黃灣以溉十六萬頃田復於畏吾寺前後  
建三橋以通水門俾小舟常入湖取泥以濬深可  
久不涸功未就卒

成化十九年都御史劉敷等清理續占李旻濬治西  
湖議成化十九年巡視都御史劉敷用杭人通政  
何琮之言會同都布二司臨湖查勘凡宣德正統  
等年圈築報稅者一切鋤而去之稅糧百三十餘

石派之隄西有產之家代納

弘治十二年御史吳一貫修築石堰

李旻西湖修復石堰記武林諸

山之水滙而為西湖西北際山東至錢塘湧金二門之城下傾湖數千百家為稼為圃為池以畜魚皆湖是資窮民用釣弋網罟之類衣食於湖者不可勝計餘波所及為六井為清湖河達於運河城外並河之田千頃賴以灌溉湖之所利濟大約如此白樂天通石函蘇子瞻築石堰所以鍾其源而節其流用意深矣石函之流細故曰減水一寸可溉田十五頃每一復時可及五十頃此蓄洩之節度而溉田之方也若石堰則所堰有一定之則日夜常流其流入於運河雖有霖雨暴漲不使驟溢以為瀕湖之害無餘則蓄而流之且以待石函之洩函與堰不可偏廢也後之人不深維其意壞堰而易之以版由是守者得以為奸漲溢乃斬而不啟旱則啟而竭之或因而取貨焉為湖之病數十

年於茲矣弘治丁巳監察御史吳君一貫巡按浙江以興利除害為己任予告之由君謀於都水主事姚君文灝欲復其舊適安福胡君道以進士來知錢塘縣事遂以委之胡君詢之鄉老相與求之故迹地勢測水定其高卑之準鳩工琢石不日告成瀕湖上下之人一旦獲享舊日之利而除其害莫不懽欣鼓舞歎頌功德堰成羣咸告予請書其事於石以示久遠予嘗以為長原樂天巨川子瞻諸君子皆古今所稱偉人其才識宦業皆非尋常可及其在郡必汲汲於西湖者豈遊觀之樂足以動其心哉亦惟因民之所利而利之特加之意云且數百年來郡乘書之民庶歌之詩人賦詠之至於今未已蓋惠利之浹於人心自能不泯滅焉爾後之視今猶今視昔然則石堰之復其係於人心之思當何如哉予郡人也樂為斯民道之是為記

弘治末正德初楊孟瑛守郡建議西湖當開者五陳

之御史車梁請達於朝從之發帑藏役人夫毀田

蕩除額稅雖謗怨者多而有明開濬之功以孟瑛

為最楊孟瑛開湖條議杭州地脈發自天目羣山

飛翥駐於錢塘江湖夾抱之間山停水聚元

氣融結故堪輿之書有云勢來形止是為全氣形

止氣蓄化生萬物又云外氣橫形內氣止生故杭

州為人物之都會財賦之奧區而前賢建立城郭

南跨吳山北兜武林左帶長江右臨湖曲所以全

形勢而固脈絡鍾靈毓秀於其中若西湖占塞則

倚山嶺獨城西一隅瀕湖為勢殆天塹也是以湧

金門不設月城實倚外險若西湖占塞則滕術絲

連容奸資寇折衝禦侮之使何藉焉唐宋以來城

中之水皆藉湖水充之今甘泉甚多固不全仰六

井南井也然實湖水為之本源陰相輸灌若西湖

占塞水脈不通則一城將復鹵飲矣況前賢興利

以便民而臣等不能纂已成之業非為政之體也

五代以前江湖直入運河無復遮捍錢氏有國乃

置龍山浙江兩關啟閉以時故泥水不入宋初傾

廢遂至淤壅頻年挑浚蘇軾重修堰閘阻截江潮

不放入城而城中諸河枯澀所謂南柴北米官商

利若西湖占塞則運河枯澀所謂南柴北米官商

往來上下阻滯而闔閭貿易苦於擔負之勞生計

亦窘矣杭城西南山多田少穀米蔬果之需全賴

皆藉湖水以救亢旱若西湖占塞則上塘之民緩

急無所仰賴矣此五者西湖有無利害明甚第壞

舊有之業以傷民心怨讟將起而臣等不敢顧忌

者以所利於民者甚大也開湖告諭先賢利民深

弘利本特濬西湖之浸用溉上塘之田多歷歲年

漸成湮廢比者鄉賢侍郎何公生長是邦習知成

事著為三說辨析百端伏蒙當道俯念地方力圖

濬復予又職司水土敢憚劬勞重惟湖上之園池

盡是豪家之封殖一旦開毀百口怨咨民既傷心

我亦動念但今民之產本昔官湖民侵於官以肥家固已干紀官取於民以復舊豈謂厲民又惟上塘萬頃之田夙仰西湖千畝之水水盡湮塞田漸荒蕪利歸於數十家害貽於千萬井況古人留利物之澤豈今日啟生事之端幸相導以平心勿相搖於異說有以占產自首者原情免罪奏請除糧查得銅錢局及崇興崇善禪智等廢寺田以畝計者數千地以頃計者盈百動連阡陌間附城圍膏沃可耕標換如數沉在昔湖田皆捏糧之稅於今清籍有新增之糧新增者至九百而有奇捏報者幾八百而不足稍加查派不費更張決不累民無患虧稅予性知執法心在利民非勢力之可移惟鬼神之是質凡我父老率爾鄉閭早為遷移無肆頑梗

弘治十八年冬十月巡按御史車梁請開西湖孝宗實錄車梁奏曰杭州西湖周圍三十餘里專蓄水

以溉瀕河千頃之田近年豪右侵占甚者塞而為田築而為居又欲固為己業則於冊內捏收田稅給帖影射水既堙塞所仰溉田乃盡荒蕪為害不小乞查所侵還官其報佃稅查給空閑田地補納湖面堙塞支帑銀可用者傭工開濬務復舊額以利生民萬曆杭州府志正德三年郡守楊孟瑛銳情恢拓力排羣議言於御史車梁僉事高江上疏請之部議報可乃以是年二月興工為傭一百五十二日為夫六百七十萬為直銀二萬三千六百



七兩拆毀田蕩三千四百八十一畝除豁額糧九百三十餘石以廢寺及新墾田糧補之自是西湖始復唐宋之舊武宗實錄楊孟瑛守杭日議開西湖至是查盤御史胡文璧劾其開濬無功費用官帑至二萬三千餘兩宜罷黜部議以功在既往理無可復宜仍將孟瑛降除杭州量用民力以終前功訖事日鎮巡官具奏

時孟瑛已陞順天府府丞故有是降

謹按陳善杭州府志楊孟瑛知杭州府係弘治十五年議開西湖陳之御史車梁梁請於朝至正德三年十月為臺臣胡文璧所劾降仍知杭州府乃又云正德三年言於御史車梁僉事高

江上疏請之無無譌舛今改正

嘉靖時禁侵占西湖者為御史傅鳳翔龐尙鵬萬曆時郡人陳善作杭州府志建疏通之議西湖遊覽志嘉靖十八年巡按御史傅鳳翔行縣清理占據四十四年巡按御史龐尙鵬刻碑於清波湧金錢塘三門巖為禁防肅宗實錄嘉靖十八年七月浙江巡按御史傅鳳翔請禁豪家包占西湖邊絕水利萬曆杭州府志龐尙鵬立石禁約西湖開築以來積數百年矣前人用情於此非徒采形勝資燕

游實為廣蓄洩以備旱潦杭民世其利至今頌之

不衰往緣豪右侵占淤塞已經前院勒石示戒歲

久法弛蠶食如故近據告發已經究正外但恐積

習相沿恬不為異陽雖追奪陰實雄據而望風效

尤專利病民者日紛紛矣特行立石禁諭凡有宦

族豪民仍行侵占及已占尙未改正者許諸人指

實赴院陳告

陳善請疏西湖議西湖形勢利病何

洋浩衍吐納眾流實為元氣所鍾環帶諸山控引  
城郭固郡城之外沙也且瀦水上流灌田千頃為  
益甚鉅豈止遊觀地哉設湖水淤塞則地脈不轉  
內外充絕若人之元氣痞閼未有能生者矣矧上

塘丁頃之用恃此為命可無慮乎昔吳越時慮湖

葑蔓合歲置撩卒千人蓋誠知所利者大雖歲役

千夫而不斷也今縱不能置撩卒以任疏濬獨奈

何任淘沙之卒湖濱分據日負數百石之土而填

之乎頃見沿城諸隄學士橋自東至西二十一丈

南北一十七丈回回墳東西三十九丈南北七十

二丈柳洲亭東西二十八丈南北十丈黑亭子灣

東西二丈即湖南北百餘丈受沙積者俱為平陸

隄增數百丈將遂無西湖矣及今不禁湖身

日隘過數十年將遂無西湖矣及今不禁湖身

波湧金錢塘三門而出若懸禁各門嚴責主守吏

卒拒遏此輩無或闌出以爲湖涵敢或相容比者

連坐則庶乎人知畏法而其源可絕矣又汀蓮岸

芷半於湖中豪右之家占以規利葑草蔓塞實此

之由嘉靖十八年巡按傅公一嘗禁之未幾復縱

至四十四年南海麗公來巡復申厲禁豐碑顯示

樹立月城明著為令而法久禁弛株蔓如故為今

之計謂宜申明前事禁治占塞或有陰復雄據者

鈔錄禁約一通示之彼雖無公儀子風節而苟有  
 人心當汗顏泚頹矣至於三橋四橋五橋外內湖  
 水勢稍涸葑草彌望不可以舟急宜疏濬以儲蓄  
 者今度其施功之序而題請於朝有事修濬苟湖  
 身深廣蓄水汪洋上塘旱暵無恐此杭民百世之  
 利也若乃淘沙之患既行禁止仍以巡察之事責  
 之湖傍里甲每獲必嚴加法懲以示警則湖流  
 不涸灌溉有賴郡城氣脈亦不至於耗竭矣

天啟四年錢塘縣令沈匡濟議疏填闕之水以清湖

上之撫按沈匡濟清湖八議看得西湖為一郡靈  
 陰賴於斯取潤金水尅制火龍尤非謬說邇者祝  
 融肆虐所在為墟將來沾溉無資千頃失望實為  
 杭民剝膚之患宜濬不宜塞與清濬之宜速不宜遲  
 不待知者而後知也惟是斷在必清而要非可易  
 言清斷在必濬而要非可易言濬何也與其易言

清而俄清俄止何如遡其原而窮其流酌量其因  
 革而使影射盤踞者必難遂其吞噬之謀與其易  
 言濬而使積汙築塞者立可收夫廓清之功裁定其方  
 略而管轄以內必不敢避勞怨坐視其化為桑田也  
 而議論欲一規畫欲定時日欲寬錢鑛欲裕弗勤  
 始怠終弗此傳彼咻弗朝令夕改竊以為兼此數  
 者始克有濟謹將一得之愚列欵上請仰候采擇  
 參與論之同定畫一之策庶不致築舍無成合就  
 申覆額如鏡無奈兼并者飾為巧辨以圖吞據也且  
 古額查為故套或播為流言以灰其心或結連豪  
 右以掣其肘率曰此原非道府意也是必請道府  
 親臨踏勘先乞十日排父老照依註冊一面檄行卑縣  
 同水利官喚集里排父老照依註冊逐一細看悉  
 如古界標監明白隨卽造冊繪圖貼說申送道府  
 候按臨親勘遠邇之人咸知事在必行負固之膽  
 稍懼一收佃帖瀕湖占踞動以官帖藉口然帖

亦有真者偽者有遠年近日者有無帖而渾稱有  
 帖者先出示將原給官帖盡行送驗如無帖者即  
 係白占即有帖者亦須以今次換給為准舊帖俱  
 不許沈匿一覈實數無帖與雖有帖而方隅不礙可  
 者固均在掘墾之數矣其原有帖而方隅若干許照  
 通融議留者亦須查帖內原佃丈尺若干止許其  
 原數承管官為釘界責令石砌以防日後延佃其所  
 佃一帖十尤屬通弊盡行搜剔庶人人心服而其所  
 清出必多矣一酌祠墓先賢祠墓不待言矣其  
 指以祠墓為名任意開拓者亦止查原勘原畝久  
 丈尺為界餘占者盡行拆去其民間墳墓不論分  
 近儘其幅員餘悉裁去一審挑運者不過數十  
 築壩以次開深即以次運泥故挑運者不過數十  
 步即弛擔假合竭湖之水而後挑則全湖皆乾矣  
 上年開闢放水更涉天旱遂滋議論殷鑒不遠可  
 復陷乎若專靠肩挑不由船運恐一筐之土費肩  
 挑數里之遙用力多而成功少也審此當別為區  
 畫矣一陳膚議錢糧動經萬計措處必難事情

一經奏請耽延必久以職膚見止須院道詳允以  
 二千金為費便可收二萬金之功夫湖中皆葑草  
 汚泥深可數尺非畚鍤可施職意造小船六十隻  
 每隻連篙櫓價銀三兩合之一百八十兩每船用  
 夫二名每名日給工食銀四分計百日一船該工  
 食銀八兩六十船共四百八十兩人給長竹柄鐵  
 釵一把方廣一尺五寸該價二錢共十二兩又人  
 各授木掀一把該價二分共二兩四錢通共六百  
 七十四兩四錢每兩入船滿則搖至空濶岸邊用  
 泥草入船滿則搖至空濶岸邊用長柄木掀拋堆  
 岸上每日可扒六船百日可扒三萬六千船計此  
 湖用如許功力疏通可遍矣尚餘一萬三千二百  
 餘兩即以為沿邊硬土開鑿之費蓋硬土一方較  
 濬淤泥一方不啻十倍至侵占諸地必官為掘運  
 亦總在此項銀內每工亦議四分計二千二百金可  
 募三萬工尚有百二十金可募船夫運泥如塞而  
 邊幅硬土亦可開鑿矣通計以三萬船疏淤塞三  
 萬工鑿漲阜濬湖事不思過半哉一運積土湖

中撈起新泥并扒毀乾泥當日即酌量某隄尚可  
 高濶某處尙應填築即令載去其不必高濶填築  
 者不許混加一簣俱要載至盡湖岸邊空濶處所  
 堆積一考工程木杆一根於湖心亭側豎起將  
 齊岸高處用朱漆記號未濬時從朱漆下量至水  
 底某處某官管下若干深某處某官管下若干淺  
 逐一登記自開濬起十日一量便知用工虛實勤  
 惰虛惰者懲仍罰撈運勤實者賞卑縣親自稽核

西湖志卷之一

總校王詒壽分校

章耀庭 金肇麒 校

西湖志卷之二

水利

國朝開濬事宜

順治十一年六月二十二日欽奉

恩詔內開

一東南財賦重地素稱沃壤連年水旱爲災民生重困  
 皆因失修水利致悞農功該督撫責成地方官悉心  
 講求疏通水道修築隄防以時蓄洩俾水旱無虞民  
 安樂利

順治間浙江左布政使張儒秀立西湖禁約凡豪

民占為私產者勒令還官朱之錫左布政使張公去思碑記西湖裏湖豪

右各插水面水簾以漁利甚者巧為官佃之帖以相塘塞湖漸小則湖日高公請於上憲飭令盡去其水簾勝岸其以官帖相抵塘者痛杖以懲之又捐俸去葑草八十餘畝此公去而杭民思之也

康熙二十四年巡撫趙士麟開浚城中河道凡河

之已塞而全疏者起清波門三橋址歷迴龍橋眾

安橋以南循中宮橋又西北循梅家橋凡十二里

其流淺而加濬者起湧金水門歷洗馬橋烈帝廟

北循武林門南抵正陽門又南抵南新關凡二十

五里費白金二萬餘兩役夫二十餘萬工起康熙

甲子十一月訖工於乙丑六月趙士麟開杭州城河紀事詩城河久

壅塞間將踰百年修濬既不易軍與力又殫我來底定後此事乃可言下車問疾苦慮患防未然此

州多火災生剋豈無權念彼負販人往來最艱難萬戶資灌輸何以福市塵論吏督畚鍤集夫出俸

錢計期六月餘厥工告竣焉開井李鄴侯築隄白樂天豈不憚慮始杭民今懽傳我愧非其人內咎

惟素餐敢謂有微勞庶幾免罪愆朱彝尊中丞趙公開河詩武林古澤國十八澗九溪當年宋宮闕

溝水流東西陳迹漸已堙深谷皆成蹊民居日湫隘編竹兼葑菘猛火一燎原悲焰百室迷塗徹大

小屋繡井愁難躋女丁配夫王相顧恆愴悽吏治徇目前孰能防禍梯中丞溢世才利器剗水犀下

車命丞倅故道資考稽率錢具畚鍤會不煩鉏犁經始底告成歲序尚未暎坐令闐闐間無異蘇白

水利二

隄紅闌鴈齒列赤石羊肝割嘔啞小航船蹀躞快  
 馬蹄停鞭市蓮蕩倚檻來鳧鷺柳陰穀犬鳴露腳  
 莎雞啼祝融迴其馭婦子方安棲乃知濟時策不  
 在拯顛濟公之治水術豈獨過白圭泉流原隰平  
 名與召伯齊我家由拳城閭巷多蒿藜願公祛墨  
 吏如決濁水泥上以答  
 天子下以寧  
 羣黎

康熙二十八年歲在己巳春

聖祖仁皇帝履懷澤國軫恤羣黎

特舉省方之典

巡幸至浙駐蹕西湖澤溥萬民恩周庶類

御製七言詩一首并序

宋臣蘇軾開河漑田築隄瀦水杭民利之為政者不  
 當如是乎

長隄十里跨湖波官柳青青覆軟莎漫道只為遊賞地  
 懸知布政在民和

閱己卯癸未乙酉丁亥之歲屢奉

南巡皆

臨幸駐蹕官民踴躍忭舞恭先濬治西湖闢孤山以建

行宮並疏湧金門城河以達

御舟雲山効靈湖波增潤漢稱明聖之瑞千古協應蓋

西泚志 卷二 水利 三  
自有西湖以來未有若斯之盛者也

康熙四十六年十二月十四日工部奉

上諭朕宵旰勤民視如赤子無一時一事不思爲閭閻圖經久之計江南浙江生齒殷繁地不加增而仰食者日衆其風土陰晴燥濕及種植所宜迥與西北有異朕屢經巡省察之甚悉大抵民恃田畝爲生田資灌溉爲急雖東南名稱水鄉而水溢易泄旱熯難支夏秋之間經旬不雨則土坼而苗傷矣濱河低田猶可斥水濟用高仰之地力無所施往往三農坐困朕茲爲民生再三籌畫非修治水利建立閘座使蓄水以灌輸田疇無以爲農事緩急之備江南省蘇州松江常州鎮江浙江省杭州嘉興湖州各府屬州縣或近太湖或通潮汐宜於所有河渠水口度地建閘隨時啟閉水有餘則宣泄之水不足則瀦蓄以備用其有支河港蕩淤淺者宜並加疏濬使引水四達仍行建閘多蓄一二尺之水卽田高一二尺者資以灌溉矣多蓄四五尺之水卽田高四五尺者資以灌溉矣行之永久可俾高下田畝無憂旱潦此於運道無涉而於民生實大有裨益今漕運總督與江

西泚志 卷二 水利 二



浙督撫方料理截漕散賑爾部速移文該督撫等令將各州縣河渠應建閘蓄水之處並應建若干座通行確察明晰具奏爾部卽遵諭行特諭欽此本年十二月浙江巡撫王然接准部咨欽遵檄行杭嘉湖三府確勘查議隨據杭州府知府張恕可詳稱杭屬錢塘縣西湖有湧金水門引湖水入城周流曲折歸於海寧地界湖北聖塘閘洩水於濠河流至新河壩其減水石堰一閘之水由桃花港入於餘杭縣界流於大河可資灌溉今桃花港淤淺約長三里應

行開濬其餘西湖通水諸處皆有舊閘可考勸率沾利農民勤加保護疏通以資田疇其支河港蕩有淤淺者令及時開浚等因詳覆會同福浙總督具題部議覆准杭嘉湖三府共建閘六十四座所需銀兩移咨戶部撥給西湖通水諸處支河港蕩令該管有司將淤淺處所勸諭民間相時開濬可也奉

旨依議去歲杭州等處被災民生疲敝今支河港蕩內淤淺若勸民開濬地方官員或藉此私派害民亦未可定

著動正項錢糧疏濬欽此欽遵鈔出到部咨院行司康

熙四十七年十月浙江布政司為欽奉

上諭事今將奉

旨察勘河渠水口應行建閘疏濬處所并奉

旨著動正項錢糧疏濬支河港蕩造冊詳報內開

錢塘縣開濬

桃花巷長四百丈濶二丈四尺開深五尺

正隆橋起至銀盤橋止長一百六十八丈六尺

寬二丈零開深五尺

永興圩起至豐樂橋止長一百丈零八尺寬一

丈三尺五寸開深五尺

賣魚橋起至觀音橋內止長一百四十二丈寬二

丈三尺七寸零開深四尺

八字橋起至教場橋外止長五百八十丈寬二丈二尺五寸開深四尺

仁和縣開濬

登雲橋起至戚家橋止長三百八十八丈寬三丈

四尺五寸開深四尺

柴公橋起至南石橋內張家浜止長一百二十

丈寬三丈七尺五寸開深五尺

杜子橋起至北石橋內止長三百四十丈寬四

丈五尺開深五尺

石灰橋起至禮佛橋內謝家浜止長一百七十

丈寬一丈五尺開深五尺

義橋起至治平寺內河港口止長一百八十丈

寬三丈七尺五寸開深四尺

五杭橋東太平橋港內長一百一十五丈二尺

寬二丈七尺

開深五尺

雍正二年二月初五日

皇上特念地方水利關係民生最為緊要

勅令工部查議浙江西湖年久並無疏濬應行該督撫  
確勘具題本年六月福浙總督覺羅滿保會同浙  
江巡撫黃叔琳題為請開水利以贍民生以裕

國計事該<sub>臣</sub>等會看得杭城地當省會附郭之縣仁

和在東北錢塘在西南自仁和而迤東則為海寧  
三縣田畝數萬頃全藉省城上下兩塘河水灌溉  
而兩河之水源則皆自西湖所流注者也湖居省  
城之西聚南北諸山之水匯七十二泉之源瀦而

為湖舊誌周圍三十餘里水由湧金門入城紆迴  
環曲而出於錢塘武林艮山諸門其出艮山門者  
入上塘河由臨平而達於海寧出錢塘門者由三  
閘而至松木場桃花港與武林門之水共注響水  
閘凡湖墅支河與古蕩西溪沿山十八里之田皆  
資其利有餘之水歸入下塘河而仁和北鄉以及  
錢塘之下八鄉實沾蔭焉此西湖水源出入之大  
概唐臣白居易所謂每放湖水一寸可溉田十五  
頃每一復時可溉五十頃若蓄洩及時則瀕湖千

頃可無饑歲者此也然西湖之所以灌溉利溥者由湖界直接山腳沿湖諸山之水暢流入湖而無所壅遏一由山水所來要口俱設小閘以阻浮沙使之不能淤塞一由上塘五十里外臨平鎮之西南有東湖卽古臨平湖以爲之停蓄故其來也有源其去也有歸含泓蘊涵而無涸竭之患無汎濫之虞則西湖與上河東湖其利害實相爲表裏者矣自明季來各閘廢壞而沙土多淤繼且并其淤者而聽佃於民則山與湖隔絕而西湖之源不能

充裕上河淤淺東河壅塞則水無容納而西湖之流不能停蓄源流旣損而湖利遂微三縣之田旱不兼旬卽憂枯槁由來久矣我

皇上宵旰憂勤凡利益民生之事無一不厪

聖懷况開濬水利所關甚大

臣等奉

命詳慎查勘謹按西湖舊志三十餘里有先被民人占爲田蕩於康熙三年丈入魚鱗圖冊者計四百四十二畝零每年共徵糧銀二十兩七錢零共徵糧米一十五石五斗零其田埂內種植桑柏樹共一

萬九千三百三株并蕩內栽荷蓄魚等項管業之家每年約收租息銀三百四十四兩零又未經丈入魚鱗圖冊者計二百一十八畝若較額征之數每年亦止銀十餘兩米七石餘斗其田埂內種植桑柘樹共八千四百二十七株并蕩內栽荷蓄魚等項管業之家每年約收租息銀一百二十三兩零此項田地原屬官湖漸爲民占在互塞湖心者固爲妨礙水道卽去湖較遠者亦皆阻遏水源况所納於官者每年僅銀三十餘兩米二十餘石卽所利於民者每年亦止花息銀四百九十三兩零其爲官民利益者甚微而所損於三縣民田者實不止於鉅萬今荷

聖恩軫念民生修復水利所當仰請

皇仁豁除糧額照西湖舊址盡行清出歸湖去其梗塞開通水源以貽萬世無窮之利其從前所種桑柘等樹或移植於附近隄岸或移植他處以收花息各聽民便至現存湖址二十二里四分有奇通計裏外湖面一萬一千三百一十五畝零淤淺硬沙

葑灘共三千一百二十二畝應將淺涸者挑深淤塞者開濬芟除葑草以復故址而暢湖流其次序則先裏湖而後外湖先硬土而後葑灘其深淺則或五六尺三四尺各就湖面形勢分別挑濬其淤泥葑草則雇用小船搬運幫築於各舊隄之上加闊加高以堅隄址其保護則沿隄釘椿編竹不使淤泥坍入湖中裏湖各橋建閘啟閉不使沙土流入湖內其委任則令鹽驛道率同府縣佐貳實心料理其工費則令布政司會同鹽驛道將府縣原

估再加丈勘節省確估造冊詳送撫臣核明具

題請

旨酌動海塘捐監銀兩於今年秋成後興工撫臣就近不時查看督率俟工成之後卽交於鹽驛道每年查看照管俾永遠不致淤塞如此則西湖之水無憂涸竭而仁錢海三縣民田旱澇有備億萬小民受益無窮於

國計民生實有裨益矣至於杭郡城內之河共有數道一爲中河一爲東河一爲小河而小河又有中

西北之分前人設筭鑿溝引西湖之水自湧金水門及流福溝而入城北出武林水門南出正陽水門東南出候潮水門復由正陽候潮門外合流而趨永昌壩以供南樞之抽分通北樞之商貨再進而入清泰水門落水於新壩以疏抽分之竹木又溢於會安壩而入艮山水門以通東路之糧食場竈之鹽船其曲折出入凡三十里然後由桃花港響水閘會流於上下兩塘河以灌溉田畝是城河正所以通西湖之血脈而利益商民者無限城河

淤塞則湖水無由出入兩河亦隔絕不通今當相其淤淺處酌量開濬附入工費項內報銷其城外上塘河一帶由省城而直達海寧凡一百二十里沿河民田地蕩數千頃各有閘壩旱則閉以蓄水澇則開以分入下塘實爲河之下流今河身支港亦多淤塞則下流不暢不能引湖水而注之仁海但地方甚爲寬廣應責成沿河各縣勸諭有產沾利之家趁冬成農隙業主出給口糧佃戶以身作工漸次開濬民分其任官董其成但加督率而不

由胥役經手則眾擎易舉工可速成矣若東湖爲  
仁和海寧二縣分轄考之於志仁和載周圍十里  
海寧載東西八里南北九里有奇旁有四閘古爲  
蓄蓄灌田之備又白居易石函記云自錢塘至鹽  
官界應溉夾官河田須放西湖水入河從河入田  
西湖不足則決臨平湖添注官河又酈道元水經  
注云靈隱山下有錢塘故縣縣側有明聖湖又合  
臨平湖經槎瀆而注於海合之諸說則東湖實西  
湖蓄水之地而止塘車戽之源利益實屬相伴但

自宋代以來從無議及開濬者臣等會勘湖地僅  
存六百餘畝雖有湖形竟同陸地沿河盡爲魚蕩  
田園清理旣難工程復大非一時可以並舉之事  
應俟西湖完工日再爲確議具奏再查浙江省城  
至江南吳江縣接界一帶官塘運河臣等會同親  
勘間有淺處而德清縣轄之大麻鎮起歷石門縣  
至桐鄉縣轄之玉溪鎮共四十里更爲淤淺半月  
不雨舟卽難行其支港亦多壅塞此河不特商旅  
往來抑且糧艘出入兼之田畝賴以車戽最關緊



要急應疏濬以通運道見在飭行布政司會同糧儲道細加丈量節省確估其開濬事宜專委糧儲道督率各官實心料理其工費亦請於海塘捐監銀內動支統聽部議再浙省各屬水鄉居多民田所賴以灌溉

國賦所賴以充裕者全藉水道疏通蓄洩有備其現在一切支河港汊壩堰埭門等項俱關水利嗣後應著落地地方官親身查勘勸諭附近得沾水利之家業主出貲佃戶出力每年於冬成農隙務必疏

濬深通修整堅固以資次年春夏灌溉以備不時旱澇並責成糧儲道督率各該管知府及水利廳不時巡視查看將每年農隙時修築水利於次年正二月逐一告竣該道府據實通報院司委官勘驗如有懶惰偷安荒廢水利者即將該管各官以玩忽民事糾參處分庶水利漸可興復以祈仰副皇上勤恤民隱之至意緣係奉

旨委勘事理謹將勘過情形先行題覆所有工費事宜現在飭行布政司會同糧鹽二道逐一丈勘估計

臣謹會同浙江撫臣合詞具題伏乞

皇上睿鑒勅部議覆施行六月二十日題七月十六日奉

旨該部議奏欽此欽遵抄出到部工部等會議查浙江仁和錢塘海寧三縣民田該督等既稱皆賴兩塘河水灌溉而兩河皆自西湖流注久因沙土多淤聽佃於民利益甚微所損民田不止鉅萬仰請

皇上豁除糧額照舊址清出淤淺沙灘相應挑濬工費確估核題城內之河淤淺處亦酌量開濬附入工費報銷等語應如該督等所題將民人所占田蕩照西湖舊址清出應徵銀米准其豁除造冊報明戶部其湖中沙草淤淺之處應令開濬深通使水得以停蓄其舊隄坍塌之處即將所挑沙草幫築堅固推原歷來淤塞不特湖中葑草滋蔓抑由上流沙土填積應於裏湖各橋建閘啟閉不使浮土得入湖內以礙湖流前項工程既稱令鹽驛道節省確估該撫核實題報准動海塘捐監銀兩於秋成後興工工完之日仍交鹽驛道經管該撫不時

查察每年取具該道並無淤塞甘結報部城內河道淤淺之處應開濬者亦行酌量開濬該督等一併確估題報可也雍正二年九月二十一日題本月二十七日奉

旨依議

雍正二年十月兩浙鹽驛道爲請開水利以贍民生以裕

國計事照得西湖蓄洩灌溉仁錢海寧三邑民田湖流通達上下兩湖轉運漕船鹽艘利益農商關係

甚鉅湮淤年久湖流漸涸荷蒙

皇上軫念民生

特命開濬本道祇承

奏委總理湖工敢不竭盡心力以上副

聖懷而下興民利今屆農隙之時所有開濬事宜頒示條約合行示仰在工官役人等遵照悉心料理實力奉行如有玩愒從事貽悞工程及存私苟且扣剋冒銷者一經察出定行分別詳參究處各宜凜遵今將開濬事宜條約開後

一 裏湖外湖城河營河桃花港烏麻斗門等處俱  
 一 委員督理分段起工  
 一 開濬西湖委分理官四員編立天地人和四號  
 一 外湖二號裏湖二號每號管稽工官三員一切  
 一 區畫工程分理官各照派定段落弓口分任其  
 一 事稽工官隨聽約束稽察夫工  
 一 人夫工值及一切器物價銀俱赴寧紹分司衙  
 一 門具領轉給除應用銀者悉照原銀外其應用  
 一 錢文該分司兌換制錢給發  
 一 稽工官支領人夫船隻工值銀錢俱用聯票支  
 一 單註明本號某日夫船若干工值若干印鈐戳  
 一 記赴寧紹分司衙門支給其根票該分司存  
 一 各以一號起按次挨編勿得紊亂  
 一 人夫每日卯刻起工酉未散工  
 一 裝運泥草每船用夫二名連船每日給工食銀  
 一 錢二分掘土長夫按工給銀挑工擔夫按工  
 一 給錢按工悉照藩司原定每日五分至按擔則  
 一 計其路之遠近酌量給錢不得虧減亦不得浮

增  
 一 開湖或三四尺五六尺不等分理官各照湖面  
 一 高下形勢畫一深濬淤泥務須去淨如有硬土  
 一 亦必開挖刪除葑草不得存留根葉致滋延蔓  
 一 挑出淤泥葑草悉依藩司定議先將裏外六橋  
 一 兩旁各幫出丈餘用鐵木釘樁每隔二尺釘樁  
 一 一株貼樁上用竹笆一層所起泥草傾貯兩旁餘  
 一 即平鋪隄上俟乾燥築堤實至幫築兩隄外  
 一 所餘泥草於裏外湖就近擇官地及空閒處所  
 一 堆墊  
 一 開湖器具每號用山支五十把鐵扒五十把鐵  
 一 鍬五十把勾草窩刀五十把掀蒲一百把排跳  
 一 足用馬跳足用提箕一百具挑泥大土箕一百  
 一 具泥鬮一百具料杓一百具打壩板足用水車  
 一 足用  
 一 開湖器具稽工官查明本號需用何項若干填  
 一 單赴寧紹分司衙門支取轉發夫頭給用臨晚  
 一 散工之時夫頭點明收繳倘有遺失偷竊責令

賠償如有損壞給價修整有不堪用者繳還另  
 給行戶辦繳椿木毛竹等項悉係現價採買俱照  
 原定直長大小數目相符者驗明收用如不合  
 式不得混收  
 一 人夫俱自備飯食一日兩餐許飯鋪於工所就  
 近搭廠煮賣每屆飯時聽夫頭鳴鑼為號各夫  
 即停工喫飯飯畢夫頭仍鳴鑼為號催令就工  
 一 稽工官奉調辦公并隨帶家人書役俱難枵腹  
 從事照藩司原議每員每月給飯食銀十兩按  
 月支給  
 一 夫頭分隸四號每號五名亦照做工人夫每名  
 每日給工食銀五分十日一發但須勤督散工  
 一 鋤墾挑運催趨工程如狗情故縱柳示工所俟  
 一 工完之日責放  
 一 凡支領船隻夫工及器具價值稽工官每日一  
 報分理分理官五日一報本道查核該分司亦  
 每屆五日將各號支領數目彙冊送核

一 老佃新佃自徐蕩河頭及小南湖等處阻遏水  
 源者其開去八十五畝零其應納銀米詳憲具  
 題豁除至民人廬墓安土重遷而又仍不礙水  
 源者俱免挑濬  
 一 城中河道上河自斷河頭起至艮山門外止計  
 長八里中斷河頭至涪祐橋計三里河身極狹  
 應開深四百六十六丈一尺中河自鳳山水門  
 起至武林水門止計長十里內有淤淺沙灘共  
 開一千六百二十八丈二尺中小河自新宮橋  
 起至回龍橋止計長六里又清波門吊橋起至  
 府學前連司河止通江橋起至保安橋止內淤  
 淺處共開一千九百一十六丈九尺湧金水門  
 起至營河內水洞門至井亭橋北折至八字橋  
 小西河一帶淤淺處共開二千六百餘丈八尺  
 其所開等處分段起工磬石修砌釘椿加板幫  
 築隄岸按日計工與挑濬西湖同

雍正三年九月兩浙鹽驛道王鈞為請開水利以

瞻民生以裕

國計事奉巡撫都察院案驗六月二十日准戶部咨開查開濬湖河工程關係水利田疇務使水源通暢庶旱澇有資民生受其裨益應行該撫速行題估興工不得延挨暫停倘有偷安怠惰官員卽行指明題參可也爲此合咨前去查照施行等因到院准此擬合遵照部咨事理速將應濬工程卽日嚴催估冊以便具題等因奉此本道查得西湖淤塞年久蓄洩無資海鹽等處田畝水利攸繫是以

上庫

宸衷已蒙各憲勘估修費題請動用海塘捐監銀兩開濬在案所議工料再三減核西湖除老佃新佃有民間田舍墳墓不開外實需工料銀三萬三千六百二十七兩六錢零又城河營河桃花港烏麻斗門等處均關農民僭運商賈往來現在淤塞亦經奏請開濬城河實估需工料銀四千三百三十九兩零營河實估需工料銀三千四百六十兩九錢零桃花港烏麻斗門等處實估需工料銀一千三百

一十五兩零以上共需銀四萬二千七百四十二兩零本道世受

國恩忝登仕籍高天厚地未能矢報涓埃今情愿照所估之數勉捐已資以竣公務仰副

聖主眷念浙土利便民生至意伏乞據情入

奏俾下吏微忱得以上達爲此備由另具書冊呈乞照詳施行

雍正四年七月巡撫浙江都察院右副都御史臣李衛爲詳請代奏恭謝

天恩事據鹽驛道副使王鈞詳稱切鈞猥以疏庸荷蒙皇土破格擢用昇以兩浙鹽驛兼管南北樞務受恩深重時切悚惶所有捐濬西湖城河等處乃小臣稍展涓滴之微忱仰荷

聖恩頒諭浙江鹽驛道王鈞急公効力捐助西湖挑濬工程銀四萬兩情詞懇切著准其捐助王鈞著交與該部議敘具奏隨經部議准加二級又蒙

特旨王鈞著加四級鈞聞命之下感激無地伏念鈞微末小臣涓埃未報仰蒙

聖眷格外優加鈞惟有竭盡駑駘仰報  
高厚洪恩於萬一此實出曠古未有之  
殊恩用敢瀝情冒懇俯賜代奏恭謝

天恩等因到臣據此該臣看得浙江鹽驛道王鈞因捐  
助西湖挑濬工程四萬兩奉

旨交與該部議敘部議王鈞准加二級奉

旨王鈞著加四級欽此轉行欽遵去後今據王鈞詳稱  
伏念鈞微末小臣涓埃未報仰蒙

聖眷格外優加鈞聞

命之下感激無地惟有竭盡駑駘仰報

高厚洪恩於萬一懇請代奏恭謝

天恩前來臣查司道官員議敘加級無代疏謝  
恩之例今該道王鈞係蒙

皇上格外特恩是以據情具奏代謝

天恩伏乞

皇上睿照施行奉

旨該部知道

雍正五年三月巡撫浙江都察院右副都御史臣



李衛題爲請開水利以贍民生以裕

國課事該<sub>臣</sub>看得開濬西湖原估應需工料銀四萬

二千七百四十二兩零嗣據鹽驛副使王鈞情愿

照數捐出已資修濬經前署撫臣傅敏奏明荷蒙

俞允欽遵在案先據署布政司事按察司董永芟詳稱

該道著陞任杭州府知府魏定國及分理各員督

率挑濬陸續興工俱於雍正四年十月二十日各

工全竣至老佃新佃內有無礙源流安土難遷者

不行開濬其餘徐蕩河頭小南湖等處八十五畝

四分六釐查係阻塞源流亦於原估捐項數內挑

濬完竣統計原估銀內實用過銀三萬七千六百

二十九兩零造冊詳送察核題銷至湖工雖已告

竣而淤泥葑草時常生長在所不免并請題明將

此節省銀五千一百一十三兩零置買田畝交地

方官將每年所收花息爲不時疏濬歲修之費於

年終造冊報查再運河工段現在河水充足應暫

停開濬仍將一切湖河工程責令該道不時查察

遇有淤塞卽行督理修濬等因前來<sub>臣</sub>協同在省

司道親加查勘察核無異除冊送部外理合題銷  
伏乞

皇上睿鑒勅部核覆施行奉

旨著察核該部知道

雍正五年六月鹽驛道為請開水利以贍民生以  
裕

國計事本年三月奉巡撫都察院憲牌內開開濬湖  
工節省銀兩業經本都院題明置買田畝交地方  
官將每年所收花息為不時疏濬歲修之費於年

終造冊報查在案今查前項銀兩既經題明自應  
一面置買得以收息備用合行飭知仰文到即將  
湖工節省銀兩作速置買務須確查實在附近腴  
產不得以荒瘠田地擅購塞責仍將契買何人產  
業應該價銀若干並坐落都圖地名每畝每年除  
完糧外額租若干及承佃姓名逐一造冊加具不  
致拖欠印押各結詳報以憑察核等因遵將契買  
田產造冊開後

一買海寧縣陳姓田地共八百六十一畝五分七  
釐六毫隨產庄屋二百八十五間二所每畝時

價銀四兩五錢三分九釐六毫共該銀價三千九百一十兩六錢九分三釐五毫

一買海鹽縣張姓田地共二百三十九畝九分八釐五毫隨產庄屋一十八間每畝時價銀四兩五錢三分九釐共該價銀一千八十九兩二錢九分一釐九毫

以上共價銀四千九百九十九兩九錢八分五釐四毫內奉撥給聖因寺僧人饒田一百畝一分隨產房屋一十六間每年應收租米八十六石三斗四升租銀一兩六錢租豆一石已經給照令寺僧自行收租完糧餘存以供食用外實存田地水漚一千零一畝四分六釐一毫庄屋二百二十七間

二所每年應徵租米八百三十石七斗八升租銀八十八兩一錢四分租豆三石九斗租麥一十八石一斗每年應完條截正耗銀一百三十兩零九釐四毫南漕二米七十二石一斗八升一合又除海鹽縣收租雇船雜用銀三十四兩三錢六分一釐六毫其餘租米麥豆照時價變賣並租銀一同起解悉充西湖歲修之用其田地另立西湖歲修戶名田租責成該縣印官每年遴點誠慎經制吏書一名承管年年更換不得常川管理以滋包收

中飽之弊夏租銀兩麥豆於五月內照數催收六月內照依市值折銀起解秋租米石於十一月內催收十二月初旬照依市值折解凡關動用聽司道核明數目先期詳請批允方始撥給不得浮冒花銷及那移別用至此項租息係關歲終報部卽同正項錢糧令該縣各按佃戶承種畝數應輸夏租秋租若干開造額徵比簿設立三聯印串收租之日將一張截給該佃歸農餘存二張以備登填比簿及不時弔查之用庶佃戶不致拖延經承無

從乾沒如過期不完該縣卽摘拘追比不許顆粒逋欠倘遇水旱災傷卽令該佃報明印官申報司道衙門詳憲照例委員覆勘確實按被災輕重分別減免至經承下鄉收租船錢飯食旣經該縣詳明於租息內動支不許需索佃農一文一粟如違察出重究雍正五年十月二十八日具詳到院隨批此項租息每年徵收完欠俱應該道督催夏冬二季解收道庫所議責成該縣徵收之法俱如詳行至歲修動用報銷事宜藩司主政會同該道核

詳仰卽移司畫一遵照可也

雍正五年七月鹽驛道爲請開水利等事案於上年十二月據署杭州府呈詳議建金沙港赤山埠丁家山茅家埠石堰閘四座以蓄洩沙水入湖於報銷冊內聽留銀兩俟來春委員建築今時屆春和亟應建造未便延緩合行嚴催仰文到卽便具領仍將委員及興工日期報查以憑核轉題銷可也

雍正五年七月鹽驛道爲請開水利等事據錢塘縣民徐子佩等呈稱西湖蓄水灌溉田禾所利甚溥因葑草難除屢致湮塞今蒙疏濬恐葑草復生竊思畜養草魚將新長葑芽隨時嚙去則人力不勞而功速呈懇借給魚本置買魚秧畜養刈草公私兩利等情批行杭州府查議該府詳據錢塘縣詳稱西湖葑草湮塞之患其來已久前賢芟草之法詳且盡矣從未有議及公私兩利用力綿長永絕葑患者也今漁戶有畜魚去草之請謹悉心詳議候賜核轉遵行等因卑府覆議酌領三百金借

本生息抵作刈草工費俟魚長貨賣將本銀繳還各漁戶既有花息聽其出資畜養每年於芟除葑草外再爲酌議完租以充公用倘有芟刈不盡并藉端生事者繩之以法等因到道據此查西湖原係公家之產向來捕魚撈草聽從民便並無禁約今若於養魚處所毋許民間私捕設爲厲禁非特大拂民情且起爭端不已改議於裏湖設斷養魚禁人採捕其外湖一帶仍聽民便似爲平允是否可行統候憲裁等因到院隨批如詳行飭令府縣

實力巡查毋致虛應故事

雍正七年十月鹽驛道爲請開水利等事本年六月十三日本道詳據錢塘縣估修溜水閘工料於雍正五年西湖歲修銀兩內給發務期修築堅固工竣將用過銀兩造冊詳銷緣由奉批如詳動給樽節辦理修築堅固工竣據實造冊詳送核銷仍移知藩司備案繳遵經行知藩司備案并行錢塘縣取領給發飭令樽節辦理去後今據該縣申稱遵奉核給前銀購備物料於七月初八日開工修

築稟奉憲飭樽節辦理今經工竣理合造冊詳銷等情到道相應據詳伏候察銷等因到院隨批仰布政司會同鹽驛道確勘實報銷冊併發

雍正五年十一月布政司鹽驛道會詳爲請開水利等事本年六月據錢塘縣詳稱蒙本道牌催建閘興工日期遵將赤山埠茅家埠丁家橋三處先行備料興築於本月二十七日興工合行報明至金沙港一處復加履勘係出天竺靈隱諸山之水澗身長闊每遇雨集溪流橫決沙石繁多非閘可

能堵禦詢之士人必須添建滾壩一座方可阻沙使不洩入湖內以免湮塞之患合並詳明伏候批示委員查勘以便核估冊報酌奪遵行等情到道據此隨查旣應添設滾壩何以從前估計工料時並不議及是否必須批行杭州府查勘定議去後據該府詳據該縣詳稱金沙港地勢高阜澗身長闊聚天竺靈隱諸山之水一逢驟雨急流洶湧石走沙行穿溪泛濫非閘可能堵禦詢之里民務須建築滾壩方可阻積流沙不致沖入湖內從前估

計工料時緣未咨訪明確是以未經議及擬合詳覆等情到府當查滾壩如果必需應作何建築并估計工料若干切實定議詳覆據詳查得金沙港添建滾壩必須高五尺闊二丈四尺兩岸用大石砌壩二十丈中豎大石柱木檻用巨石築砌壩心以保矧陷壩內開深十丈以積流沙所需工料未便苟簡造具確實妥冊伏候核轉等因轉詳到道據此金沙港既需建築滾壩則原估建閘工料便可扣存築壩之用復飭該府確查去後又據詳稱

遵查金沙港添建滾壩應與閘並建方得唇齒相依築壩於內以鎖緩洶湧之勢建閘於外使水徐行以積沙石斯爲有益若止建壩一逢驟雨急流直瀉盤過終無實濟且出水之處前開成湖今復淤成陸地故敢悉心據實詳明等因到道該本司道會查得湖工報銷案內聽存建築赤山埠等石閘四座於本年四月領銀興建旋據詳金沙港一處必須添建滾壩一座並稱與閘並建方得唇齒相依愈加堅固將建壩工料及三處建閘用過工



料造冊前來查滾壩據詳必須添建應如所請於  
西湖置產銀內給發同未建之金沙港石閘一併  
上緊僱工興築工完造冊另詳察銷伏候照詳施  
行隨批如詳興建

雍正七年十月布政司爲請開水利等事奉總督  
部院管巡撫事批前司呈詳金沙港閘座之外泥  
沙淤成陸地互塞湖口勘驗開濬及壩內泥沙易  
於壅積設立壩夫旋積旋挑緣由奉批金沙港滾  
壩工完仰候據冊咨部至開濬淤泥並設立壩夫

之處應卽確估挑工酌定工食詳奪繳奉此據鹽  
驛道檄飭錢塘縣確估議詳據稱查金沙港從前  
未建閘之先沖沙淤塞湖面是以前令詳明築壩  
業經工完報銷在案第閘下原留高埂埂外未濬  
淤灘以及貼溪復淤之處應請復爲開濬至於請  
設壩夫二名務募就近勤慎居民專司其事如遇  
山水驟發卽將沖積壩內泥沙挑運遠處倘溪流  
橫決沖沙越壩旋上閘板堵禦隨積隨挑毋令瀉  
入湖內庶永遠保無復壅之患所有工食每名按

季給銀一兩八錢以為衣食挑運之資如敢因循怠惰致使沙積湖淤驗明責懲罰濬外另募承充既可杜役食之虛糜又可專挑運之責守等情到道應將所估價銀於西河歲修項下動支給發樽節料理按冊開挑工完造冊報銷至設壩夫工食每名歲給工食七兩二錢亦於歲修項下給領募勤慎居民充當如山水發流泥沙積聚令其挑運遠處旋積旋挑毋使瀉入湖內以免壅積之患仍容本道不時委員查勘如敢因循怠惰責懲罰濬

另募承充等因到司擬合轉詳隨批如詳移行遵照仍將現在開濬淤沙嚴催僱竣據實造冊委員驗勘取結核銷繳

季衛開濬西湖碑記雍正二年

天子詔親藩重臣循行畿輔察水利之當興治者於時

奏事者及浙之西湖

天子曰俞咨爾封疆勤乃修理率事於官役力於民頒

給廩錢無滋擾於百姓議成動需帑金四萬二千

有奇會澤州王副使任兩浙轉運鹽驛使因舉濬

湖事屬之副使曰民之事

君事也予受

君恩深每願有所報効請如所直獨成其事

聞

制曰可於是命有司集民夫聚舫艦齊奮鍤募者如雲

貧民因力資生動以萬計凡沙之灘者汰去之泉

之灘者疏決之葑之固結而蔓延者芟刈而剔除之日勤旬勞閱歲乃成於斯時也湖天一碧廓如鏡如憩於中亭御風冷然鳥鳴於山魚鱸於淵老穉來觀相與嬉遊於皞蕩之天其間

宸遊之宮 天章之亭闕者補圯者修巍然煥然水光雲影高下掩映五年冬奉

命改為佛寺供

聖祖仁皇帝神御凡昔日遊豫之地俾臣民咸得瞻仰焉又城中坊衢鱗接聚干族通百貨實憑於河湖水既濬河可次及於是跡其源流通其經歷者涇者澮者泚者使之轉注以循纏絡非特利舟楫亦可餘五千金乃置田畝俾官計其歲入揭為歲修尚利副使可謂詳於治事矣余出撫浙親承聖訓率事惟勤納人於忠如副使之殫心竭力以忠奉朝廷之勤是謂按職其人可書厚積蓄以為灌漑長使水早有備其事可書蘇白以降作者幾人猶多廢

宸衷 格今則發自 由京畿及海甸百廢具舉時又宜書以是三者因

天子命且志其歲月使史家有如遷固之書河渠志溝

王鈞開濬西湖碑記 洫者或有取於是文雍正六年三月記

皇帝臨御之二年化浹恩沛川瀆貢珍育物之仁與天無極

特軫東南民力將興水利乃博采羣議以杭州西湖可

詔浙省臣工亟謀開疏之宜事下前督撫議支藩庫以

命運離是邦謬荷重寄於恤亭戶蘇罷商外思所以報

効萬一竊聞古轉運之職在漢治粟內史有幹官

如高謂主均輸之事謂筦鹽鐵而權酒酤也唐置

重臣為諸道轉運鹽鐵使而引水入田之法見於

白公錢塘湖石記宋至道三年分天下為十八路

兩浙合為一並置轉運使副熙寧七年始於杭州

置司漕挽芻粟一以歸之其時能於官者往往以  
醜析河渠著聲沿及元明運使始專理漕政則運  
鹽諸河尤當興復轉運之兼水利由來久矣因願  
捐已貲如前所議之數畢力挑濬俾微臣涓埃之  
忱得達

宸聽旋蒙

俞旨俯允鈞聞

命之下忻忭踴躍循視湖隄審其淤塞之狀則裏湖自  
孤山路迤西向為有力者占種菱荷漸次沮洳十  
之二三焉外湖自柳洲迤南過湖心寺縱橫十餘  
里葑老根深雲橫陣布奸民將覬為稻畦十之七  
八焉於是簡委賢員召夫以萬指計畚鍤雲集晴  
霽而作霖潦而止葑者雍之淺者疏之始雍正二  
年十一月初十日訖雍正四年十月二十日凡闊  
以丈計者若干深以尺計者若干若赤山埠金沙  
港諸處自明楊公孟瑛開濬後侵為田廬冢墓者  
年久堙壅遠商掘廢恐致公私驚擾欲復如唐宋  
時環湖三十里際山為岸之舊誠未易言唯是湖

聖祖仁皇帝

省方南幸浙中西湖  
駐蹕凡五今奉

而澄泓練如鏡如羣峰鱗鱗倒影在下漁舸蓊艇  
縱恣所如郡人來遊者咸快舊觀之頓還旱乾之  
有賴也洪惟我

行殿供佛為報本嚴先之地  
天章奎畫照映湖山魚鳥翔泳久久被澤恭以餘財葺

棟宇潔瑱坊青紅楹檻煥然浮動於水雲光影中  
蘇公隄向為水齧基地日削則將所浚葑泥加庫  
為崇凡三尺增隘就廣凡尺許而城內中河西小  
河之與湖流交通者亦浚之以利舟楫東河受蔡  
河橋外沙河之水為鹽艘運道除污展清所以盡  
厥職也總會計之實費銀三萬七千七百兩而開  
河之役始告備夫經理西湖自李鄴侯白太傅以  
來莫如蘇子瞻楊溫甫子瞻既疏利害於朝復具  
申三省籌畫明悉無可摘索而御史賈易已劾其

科騷部內以事遊逐雖廢格不行宰臣未免有兩罷之請溫甫力排羣議銳意行事終以清理包占地蕩為豪右所忌二公雖功在後世所遭逢何其難也今鈞於二公駑劣無能為役伏遇

聖天子在上濬川距滄邁舜禹之鴻績舉久墜無窮之利而施於民不待倡議於有司且閔微勞加以四級若前撫憲傅公下情既不壅於

上聞今制府李公督率有司以觀成功然則鈞之才雖遠不如蘇揚而鈞之遭逢極盛寧非二公所深願不得者哉事既竣餘銀五千兩買田若干畝使籍田戶之租視葑稍生即募人剗盡歲以為常繼是毋廢墜毋侵冒不必設開湖之司立撩湖之軍所以為此邦生齒計久遠者在是矣爰記顯末以俟來者雍正六年戊申季春之吉

伏查原題會勘疏內復有修濬上下塘河之議俱不入工費項下應俟西湖工竣之日興修至原疏

外尚有應行修濬之處均關湖水蓄洩公私利賴

雍正五年二月欽奉

上諭浙江杭嘉湖三府上年秋冬之間雨水稍多收成略覺歉薄今年青黃不接之時已令地方官商酌平糶以濟民食但念米價雖不至昂貴而無力窮苦之民本無糴米之資甚屬可憫著動用庫銀四萬兩令巡撫李衛會同將軍鄂彌達觀風整俗使王國棟悉心商酌於地方或開濬河道或修理城垣隄岸令小民就近傭工藉以餬口倘四萬金尙不敷用著李衛

等再行具奏請旨特諭臣李衛等欽遵察勘次第奉  
行是以上下兩塘支河港汊堰埭橋梁凡湖流所  
屆遠近處所靡不修舉堅固疏濬深通仰見

睿慮周詳

皇仁溥博東南水利永賴於億萬斯年矣

謹按西湖水利至明季廢弛已極豪民巨族於水  
面各插水簾以漁利甚或巧為官佃之帖以相欺  
罔塍岸既多湖流漸涸  
國朝立為禁防清理私占開城河以通湖水出入西湖  
舊跡不致盡湮恭遇  
聖祖仁皇帝仁覆天下勤恤民隱發帑興修久為東南利  
賴我  
皇上善繼善述視民如傷首重農田大興水利守土之

臣幸際  
昌期得少竭悃誠以上襄  
盛治自此湖流綿遠垂利無窮誠千載一時之隆遇  
也謹拜手稽首以志慶幸云

西湖志卷二

總校 董紹舒  
分校 陳銛  
朱昌壽校

←→





